

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI KHAMIS : 15 NOVEMBER 2018

NO. SOALAN : 1

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN TEH KOK LIM [TAIPING]

TARIKH : 15 NOVEMBER 2018
MENJAWAB

SOALAN : 1

YB TUAN TEH KOK LIM [TAIPING] minta **PERDANA MENTERI** menyatakan status undang-undang terkini berkenaan dengan pemilikan kapal Equanimity serta status dan prosedur lelongan awam kapal tersebut.

JAWAPAN: YB TUAN MOHAMED HANIPA MAIDIN
Timbalan Menteri Di Jabatan Perdana Menteri

Tuan Yang di-Pertua,

1. Kapal Equanimity telah ditahan atas suatu Waran Penahanan pada 7 Ogos 2018 yang dikeluarkan mengikut bidang kuasa admiralti Mahkamah Tinggi Kuala Lumpur. Pada 24 Ogos 2018, Mahkamah Tinggi telah membuat perintah untuk Equanimity dijual melalui tender awam. Selaras dengan perintah mahkamah tersebut, seorang broker *Central Agent* telah dilantik untuk menguruskan penjualan kapal tersebut. Seorang penilai juga telah dilantik untuk membuat penilaian kapal Equanimity. Nilai harga Equanimity adalah sulit dan tidak boleh didedahkan.

2. Semua tawaran bagi kapal tersebut akan dibuat terus kepada Syerif Mahkamah dan Syerif Mahkamah diberi kuasa untuk menerima harga tertinggi yang ditawarkan. Tender awam ini telah dibuka pada 29 Oktober 2018 dan akan ditutup pada 28 November 2018.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA DR.
MAXIMUS JOHNITY ONGKILI
[KOTA MARUDU]**

TARIKH : 15 NOVEMBER 2018 (KHAMIS)

SOALAN NO.2

DATUK SERI PANGLIMA DR. MAXIMUS JOHNITY ONGKILI minta **MENTERI AIR, TANAH DAN SUMBER ASLI** menyatakan apakah pendekatan baru Kerajaan untuk mengurangkan air tidak berhasil *Non-Revenue Water* (NRW) di seluruh negara. Beri data terkini NRW bagi setiap Negeri untuk tahun 2017 dan 2018.

JAWAPAN

Tuan Yang di- Pertua,

1. Sebagai badan kawalselia industri perkhidmatan air negara, Suruhanjaya Perkhidmatan Air Negara (SPAN) telah menetapkan sasaran NRW sebanyak 31% di bawah RMKe-11. Bagi mencapai sasaran ini, Kerajaan Persekutuan melalui Kementerian Air, Tanah dan Sumber Asli (KATS) akan melaksanakan beberapa pendekatan baru seperti berikut:
 - (i) pembiayaan modal (CAPEX) oleh Pengurusan Aset Air Berhad (PAAB) kepada operator-operator air bagi program seperti penggantian paip-paip air lama jenis asbestos simen, penggantian meter air, perwujudan *District Metering Zone* (DMZ), penyediaan *Geographical Information System* (GIS) dan pembaikan dan penggantian tangki-tangki air yang rosak dan bocor;
 - (ii) pembiayaan secara langsung Kerajaan Persekutuan di bawah Program Pengurangan NRW Kebangsaan melalui 2 pendekatan. Pendekatan 1 meliputi 7 negeri yang

mencatatkan paras NRW melebihi tahap 40% dengan fokus utama kepada pengwujudan data asas pengukuran NRW yang komprehensif dan tepat. Sementara di bawah Pendekatan 2, Kerajaan Persekutuan akan menyediakan insentif dalam bentuk imbuhan balik dari 50% dan 75% daripada jumlah peruntukan yang dilaburkan sekiranya operator air berjaya mencapai sasaran penurunan NRW yang ditetapkan oleh SPAN;

(iii) kawalselia oleh Suruhanjaya Perkhidmatan Air Negara (SPAN) dalam 2 aspek:

a. sasaran pengurangan NRW dijadikan KPI utama dikenakan ke atas operator air. Melalui cara ini, ia mendorong operator air berusaha lebih gigih dalam mengurangkan NRW masing-masing; yang dan kawalan kualiti produk; dan

b. kawalan ke atas kualiti bahan dan produk yang boleh digunakan oleh operator air seperti kelengkapan, peranti, bahan, sistem dan kemudahan. Bahan dan produk ini juga perlu mematuhi standard yang diiktiraf dan berdaftar dengan SPAN; dan

(iv) peningkatan tahap kompetensi tenaga kerja dalam sektor air selaras dengan kehendak Seksyen 49, Akta Suruhanjaya Perkhidmatan Air Negara (Akta 655). Ke arah ini, SPAN telah menjalinkan kerjasama dengan Lembaga Pembangunan Industri Pembinaan Malaysia (CIDB) dan Jabatan Pembangunan Kemahiran (JPK). CIDB akan membantu mengadakan siri latihan dan kursus kompetensi kepada tukang paip (pemegang permit A1 dan A2 dan C). Manakala JPK telah membantu membangunkan skim pentauliahan pekerja dan juga Standard Kemahiran Pekerjaan Kebangsaan (NOSS).

2. Kedudukan NRW terkini bagi tahun 2017 dan 2018 adalah seperti berikut:

- (i) Pada tahun 2017, purata NRW kebangsaan ialah 35.3% dengan Negeri Melaka mencatat peratusan NRW terendah iaitu 19.6% manakala kadar NRW tertinggi dicatat oleh Negeri Perlis 60.7%.
- (ii) Manakala purata NRW Kebangsaan bagi suku kedua tahun 2018 ialah 33.2%. Negeri Melaka masih mengekalkan rekod peratusan NRW terendah iaitu 20.7%, manakala Negeri Perlis kekal dengan peratusan NRW tertinggi iaitu di 63.3%.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 15 NOVEMBER 2018 [KHAMIS]

SOALAN NO. 3

Minta **MENTERI PERUMAHAN DAN KERAJAAN TEMPATAN** menyatakan adakah Kementerian bercadang untuk mengubah **Dasar Pengurusan Sisa Pepejal Negara** supaya melarang semua sisa plastik yang diimport dari luar negara terutamanya dari China, Eropah dan Australia masuk ke Malaysia.

JAWAPAN

Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) melalui Jabatan Pengurusan Sisa Pepejal Negara (JPSPN) telah menetapkan polisi bahawa semua pengimport perlu memiliki Lesen Import (AP) Sisa Plastik terlebih dahulu sebelum membawa masuk sisa plastik ke Malaysia. Permohonan yang dibuat adalah secara atas talian (*online*) melalui sistem e-Permit dan AP yang dikeluarkan adalah bagi setiap *consignment* dengan tempoh sah laku selama 6 bulan.
2. AP sisa plastik hanya diluluskan oleh JPSPN setelah pengimport mendapat surat kelulusan pematuhan kilang dari Jabatan Alam Sekitar, mempunyai lesen premis dari Pihak Berkuasa Tempatan (PBT), mendapat pengesyoran lulus pemeriksaan kilang oleh Perbadanan Pengurusan Sisa Pepejal dan Pembersihan Awam (SWCorp) dan menunjukkan bukti bergambar sisa plastik yang hendak diimport adalah *homogenous*, bersih dan bukan dikategorikan sebagai bahan terjadual (*schedule waste*). Di samping itu, JPSPN juga menetapkan bahawa semua pembekal sisa plastik wajib mempunyai persijilan ISO 14000 supaya pembekal tersebut mengamalkan sistem pengurusan alam sekitar yang efektif dan secara bertanggungjawab.
3. Sisa plastik yang diimport akan diproses oleh pengimport sama ada menjadi bentuk emping (*flakes*) atau resin sebelum dijual kepada pengusaha tempatan atau dieksport semula ke luar negara bergantung kepada permintaan pasaran. Walau bagaimanapun, pada masa kini, terdapat isu penyalahgunaan AP Sisa Plastik dan lambakan sisa plastik di kilang pemprosesan sisa plastik import yang beroperasi secara haram. Dalam hal ini, Jabatan telah mengadakan

pemeriksaan ke atas 114 operator kilang plastik yang berdaftar dengan JPSPN. Di samping itu, Jabatan juga telah memutuskan syarat baru untuk memastikan industri ini dapat dikawal selia dengan baik bagi mengelakkan AP Sisa Plastik yang dikeluarkan oleh JPSPN disalah guna seperti penjualan AP Sisa Plastik kepada pihak ketiga yang tidak berdaftar.

4. Antara **syarat-syarat baharu bagi kelulusan AP Sisa Plastik H.S. Code 3915** yang ditetapkan oleh KPKT dan perlu dipatuhi oleh pengimport bagi mengawal kemasukan sisa plastik import ke Malaysia seperti berikut :

- (i) Mengemukakan **surat kelulusan** memasang dan mengoperasi Jentera daripada **Jabatan Keselamatan dan Kesihatan Pekerjaan (JKKP)**;
- (ii) Pengesahan **kapasiti sebenar mesin pemprosesan** oleh SIRIM atau Jurutera bertauliah;
- (iii) Menyatakan maklumat **lokasi pelupusan sisa** yang dijana dari kilang pengimport;
- (iv) Mengemukakan **senarai pembeli produk akhir**;
- (v) Mengemukakan semua **senarai kilang di bawah milik syarikat**;
- (vi) penetapan **ratio** bagi syarikat pengimport sisa plastik yang mengehendkan **70% sumber import**;
- (vii) mengehendkan pengimportan hanya kepada **sisa plastik daripada premis perindustrian/ *selected segregated post-consumer waste***;

- (viii) **sekatan** pengimportan sisa plastik dari **negara membangun**;
- (ix) menetapkan **lokasi yang bersesuaian** (*zonning*) pada premis pemrosesan sisa kitar semula;
- (x) Memperkenalkan bayaran **levi** kepada pengimport; dan
- (xi) Memperkenalkan **Jaminan Bank** (*bank guarantee*) kepada pengimport.

Sekian, terima kasih.

SOALAN NO. 4

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : TUAN KHAIRY JAMALUDDIN [REMBAU]

TARIKH : 15 NOVEMBER 2018 (KHAMIS)

SOALAN :

Tuan Khairy Jamaluddin [Rembau] minta MENTERI PEMBANGUNAN WANITA, KELUARGA DAN MASYARAKAT menyatakan apakah usaha-usaha penambahbaikan bagi memperketatkan kebenaran kahwin bawah umur serta adakah pihak Kerajaan bersedia meminda akta-akta berkaitan sedia ada bagi menghalang segala bentuk perkahwinan bawah umur pada masa hadapan.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

**DARIPADA : TUAN WILLIAM LEOONG JEE KEEN
[SELAYANG]**

TARIKH : 15 NOVEMBER 2018 (KHAMIS)

SOALAN :

**Tuan William Leoong Jee Keen [Selayang] minta MENTERI
PEMBANGUNAN WANITA, KELUARGA DAN MASYARAKAT**
menyatakan proses dan cabaran untuk menguatkuasakan undang-undang untuk menaikkan had umur minimum untuk perkahwinan kepada 18 tahun bagi kedua-dua umat Islam dan bukan Islam memandangkan Undang-undang Syariah berada di bawah Senarai Negeri dan cadangan-cadangan untuk mengatasi cabaran.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 3 DISEMBER 2018 (ISNIN)

SOALAN :

Dato' Sri Azalina Othman Said [Pengerang] minta **MENTERI PEMBANGUNAN WANITA, KELUARGA DAN MASYARAKAT** menyatakan bilakah Kerajaan akan membentangkan Rang Undang-Undang bagi membuat pindaan untuk menaikkan had umur perkahwinan di Malaysia, berikutan tular banyak kes perkahwinan kanak-kanak bawah umur serta menyatakan tindakan selain pindaan undang-undang yang sedang diambil oleh Kerajaan dalam isu ini.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : DATO' SRI HAJAH NANCY SHUKRI
[BATANG SADONG]

TARIKH : 5 DISEMBER 2018 (RABU)

SOALAN :

Dato' Sri Hajah Nancy Shukri [Batang Sadong] minta MENTERI PEMBANGUNAN WANITA, KELUARGA DAN MASYARAKAT menyatakan apakah langkah yang diambil oleh Kementerian untuk memastikan perkahwinan di bawah umur tidak akan berlaku lagi.

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA
DAN MASYARAKAT

Dato' Yang di-Pertua,

Izinkan saya menjawab soalan YB Rembau bersekali dengan soalan daripada YB Selayang pada hari ini, YB Pengerang pada 3 Disember 2018, dan YB Batang Sadong pada 5 Disember 2018 kerana soalannya saling berkait.

Dato' Yang di-Pertua,

Sebagai usaha untuk menaikkan umur minimum perkahwinan dalam perundangan di Malaysia, Kementerian telah membentangkan hasrat Kerajaan ini dalam Mesyuarat *Pre-Council* Majlis Raja-Raja dan Mesyuarat Menteri Besar dan Ketua Menteri (MBKM) yang mana kedua-duanya berlangsung pada hari yang sama iaitu pada 16 Oktober 2018. Kementerian berbesar hati dan menghargai maklum balas positif semasa pembentangan dalam kedua-dua mesyuarat tersebut yang pada

prinsipnya menyambut baik cadangan Kerajaan untuk menaikkan umur minimum perkahwinan kepada 18 tahun. Mesyuarat MBKM secara spesifiknya telah memutuskan secara konsensus supaya umur perkahwinan dinaikkan kepada 18 tahun untuk lelaki dan wanita. Kementerian berharap pihak Kerajaan Negeri dapat seiring bersama Kerajaan Persekutuan dalam usaha menangani perkahwinan bawah umur di negeri masing-masing. Selain negeri Selangor yang telah menaikkan umur perkahwinan kepada 18 tahun melalui pindaan Enakmennya pada bulan September yang lalu, Kerajaan Negeri Melaka, Pulau Pinang, Kedah, Johor dan Sabah juga telah menyatakan hasrat untuk menaikkan umur minimum perkahwinan kepada 18 tahun.

Dato' Yang di-Pertua,

Pelbagai usaha-usaha penambahbaikan yang telah diambil oleh Kerajaan bagi memperketatkan kebenaran perkahwinan bawah umur ini di mana secara prosedurnya ditadbir di bawah beberapa agensi iaitu Jabatan Kehakiman Syariah Malaysia (JKSM), Kementerian Dalam Negeri (KDN), Majlis Agama Negeri-Negeri dan Mahkamah Adat.

Bagi permohonan kebenaran perkahwinan bawah umur orang Islam, JKSM telah mewujudkan Tatacara Operasi Standard (SOP) Perkahwinan Bawah Umur sebagai panduan melalui Arahan Amalan kepada Mahkamah Syariah seluruh Malaysia yang telah berkuat kuasa pada 23 Julai 2018. SOP ini antara lainnya menghendaki Laporan Sosial daripada Jabatan Kebajikan Masyarakat (JKM) negeri, Laporan Kesihatan daripada Jabatan Kesihatan Negeri dan Laporan Polis daripada PDRM dikemukakan kepada Mahkamah sekiranya Hakim Syarie mendapati bahawa laporan-laporan tersebut diperlukan dalam mempertimbangkan permohonan perkahwinan bawah umur.

Maklumat seperti latar belakang pemohon dan bakal pasangan, pendapatan, status sosial, kemampuan serta status pendidikan juga antara elemen yang perlu dinyatakan melalui Laporan Sosial agar Hakim Syarie dapat memberi keputusan yang mampu memelihara kanak-kanak yang terlibat dalam perkahwinan bawah umur ini.

Bagi perkahwinan orang bukan Islam pula, Memorandum Jemaah Menteri mengenai cadangan pindaan Akta Membaharui Undang-Undang (Perkahwinan dan Perceraian) 1976 [Akta 164] akan dibentangkan dalam Mesyuarat Jemaah Menteri pada tahun 2019. Pindaan ini antaranya akan

mengandungi keperluan untuk mengemukakan Laporan Sosial, Laporan Kesihatan dan Laporan daripada PDRM bagi permohonan perkahwinan bawah umur di bawah Akta 164 yang sedang diterajui oleh KDN.

Selain daripada itu, Kerajaan juga bercadang untuk membentangkan Rang Undang-Undang bagi Akta Undang-Undang Keluarga Islam (Wilayah-Wilayah Persekutuan) 1984 [Akta 303] dan Akta 164 selewat-lewatnya pada Penggal Kedua Dewan Rakyat tahun 2019.

Dato' Yang di-Pertua,

Saya dimaklumkan melalui sesi Muzakarah Pakar: Isu Perkahwinan Bawah Umur yang telah diadakan oleh JAKIM pada 8 November 2018 dengan penglibatan Hakim-Hakim Syarie, Peguam-peguam Syariah, Jabatan-jabatan Agama Islam dan Penasihat-Penasihat Undang-Undang dari semua negeri, terdapat negeri-negeri yang telah pun mengambil langkah proaktif dan kreatif dalam pelaksanaan SOP di negeri masing-masing.

Sebagai contoh di negeri Kedah, selain perlu mengemukakan laporan sosial bagi pasangan yang ingin berkahwin di bawah umur mereka juga

perlu menghadirkan diri ke JKM (selepas berkahwin) untuk sesi kaunseling bagi tujuan pemantauan, sehingga mereka berumur 18 tahun. Negeri Selangor juga yang telah sekian lama mempunyai persefahaman bersama JKM negeri, memastikan bahawa Laporan Sosial yang dikemukakan bagi permohonan perkahwinan bawah umur perlu mengambil kira aspek latar belakang, pendidikan, sosioekonomi dan keadaan tempat tinggal kanak-kanak tersebut.

Dato' Yang di-Pertua,

Dalam usaha mengekang perkahwinan bawah umur, persepsi masyarakat yang setelah kian lamanya menganggap perkahwinan sebagai penyelesaian kepada masalah sosial dan jalan keluar daripada masalah kemiskinan perlu diubah. Sehubungan itu, tindakan selain pindaan undang-undang yang sedang diambil oleh Kerajaan adalah seperti berikut:

- a. melaksanakan program pembasmian kemiskinan;
- b. meningkatkan kesedaran ibu bapa / penjaga untuk memasukkan anak-anak ke sekolah dan memastikan mereka tidak tercicir daripada sistem pendidikan sehingga berusia 17 tahun (tingkatan 5);

- c. meningkatkan program kesedaran dalam pendidikan kesihatan reproduktif; dan
- d. memastikan masyarakat faham tentang kesediaan kanak-kanak perempuan daripada aspek fizikal (*baligh*-cukup umur) dan mental (*Al-Rusyd*-akal fikiran yang sempurna).

Dato' Yang di-Pertua,

Kementerian tegas berpendirian bahawa kanak-kanak perlu diberi peluang untuk mengembangkan potensi mereka sepenuhnya, terutama dari segi pendidikan. Bak kata pepatah, dengan izin "*when you educate a man, you only educate that man; but when you educate a woman, you educate a generation*".

Perlindungan dan hak kanak-kanak adalah kepentingan utama dan Kerajaan tidak sama sekali berkompromi berkaitan hal ini. Kementerian akan meneruskan kerjasama dengan pelbagai pihak berkepentingan ke arah mencapai matlamat ini demi perlindungan dan kesejahteraan anak-anak kita.

SOALAN NO : 5

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN HAJI AKMAL NASRULLAH BIN MOHD NASIR

KAWASAN : JOHOR BAHRU

TARIKH : 15 NOVEMBER 2018, KHAMIS

SOALAN :

YB TUAN HAJI AKMAL NASRULLAH BIN MOHD NASIR minta **MENTERI KERJA RAYA** menyatakan kos pembinaan dan kos penyenggaraan serta operasi bagi setiap lebuh raya yang mengutip tol, pendapatan mereka melalui kutipan tol, pampasan kerajaan setakat ini dan tarikh tamat tempoh perjanjian konsensi.

JAWAPAN :

Tuan Yang Di-Pertua,

Untuk makluman Ahli Yang Berhormat, pada masa kini terdapat sebanyak 29 lebuhraya bertol yang masih beroperasi sehingga tamat tempoh konsesi. Jumlah kos pembinaan bagi 29 lebuhraya adalah berjumlah RM 35.14 bilion.

Untuk makluman Ahli Yang Berhormat juga, kos purata bagi perbelanjaan operasi dan penyenggaraan untuk semua 29 lebuhraya yang masih beroperasi adalah sebanyak RM 1.7 bilion setahun (kos operasi), RM 402 juta setahun (penyenggaraan rutin) dan RM 459 juta setahun (penyenggaraan berkala dan naiktaraf lebuhraya) di mana jumlah keseluruhan bagi kos operasi dan penyenggaraan dianggarkan sebanyak RM2.5 billion. Manakala jumlah pampasan yang telah dibayar dari tahun 1990 sehingga 2017 adalah sebanyak RM5.109 billion dan jumlah hasil tol dari mula operasi sehingga 2017 adalah sebanyak RM74.654 billion.

Bagi tarikh tamat tempoh konsesi lebuh raya terdapat 2 lebuh raya yang dijadualkan tamat dalam tempoh 10 tahun, 16 lebuh raya dijadualkan tamat dalam tempoh 11 hingga 20 tahun dan 11 lebuh raya dijadualkan melebihi 20 tahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK TAKIYUDDIN HASSAN
[KOTA BHARU]
TARIKH : 15 NOVEMBER 2018 (KHAMIS)

SOALAN NO. 6

Y.B. DATUK TAKIYUDDIN HASSAN [KOTA BHARU] minta **MENTERI KEWANGAN** menyatakan:-

- (a) berapakah jumlah syarikat yang sudah berdaftar dalam Sistem Cukai Jualan dan Perkhidmatan (SST) sehingga September 2018 ; dan
- (b) apakah tindakan yang boleh diambil oleh Kerajaan terhadap syarikat-syarikat yang gagal mendaftar dalam SST dan mengelak dari membayar cukai.

JAWAPAN

Tuan Yang di-Pertua,

- a. Untuk makluman Ahli Yang Berhormat, bagi tempoh sehingga 23 Oktober 2018, bilangan orang yang berdaftar di bawah SST adalah sebanyak 92,682 perniagaan. Daripada bilangan tersebut, 57,298 adalah berdaftar di bawah cukai perkhidmatan manakala 35,384 adalah berdaftar di bawah cukai jualan.
- b. Untuk makluman Ahli Yang Berhormat, mana-mana peniaga yang telah menepati syarat untuk berdaftar perlu berdaftar di bawah cukai jualan berdasarkan Seksyen 12, Akta Cukai Jualan 2018 dan cukai perkhidmatan berdasarkan Seksyen 12, Akta Cukai Perkhidmatan 2018. Peniaga yang gagal berdaftar di bawah SST adalah melakukan kesalahan dan boleh didenda tidak melebihi RM30,000 atau pemiliknya boleh dipenjarakan selama tempoh tidak melebihi dua tahun atau kedua-duanya. Bagi peniaga yang mengelak dari membayar cukai pula boleh dikenakan kompaun sebanyak tidak melebihi 50% daripada amaun denda maksimum yang orang itu boleh dikenakan jika disabitkan kesalahan. Ketetapan ini adalah berdasarkan Seksyen 95, Akta Cukai Jualan 2018 dan Seksyen 80, Akta Cukai Perkhidmatan 2018.

Sekian, terima kasih.

SOALAN NO : 7

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN JONATHAN BIN YASIN

KAWASAN : RANAU

TARIKH : 15 NOVEMBER 2018, KHAMIS

SOALAN :

YB TUAN JONATHAN BIN YASIN minta **MENTERI KERJA RAYA** menyatakan jalan raya Persekutuan menghubungkan Tamparuli menuju Pekan Ranau menghadapi kesesakan yang semakin meruncing. Apakah perancangan pihak Kementerian dalam menangani masalah ini.

JAWAPAN :

Tuan Yang Di-Pertua,

Untuk makluman Ahli Yang Berhormat, jalan raya Persekutuan menghubungkan Tamparuli menuju Pekan Ranau yang dimaksudkan ialah **Laluan R22**. Berdasarkan semakan stesen bancian dan isipadu trafik lalulintas terkini mendapati bahawa Tahap Perkhidmatan Jalan (*Level of Service*, LOS) berada pada tahap LOS A. Oleh yang demikian, **tiada keperluan** untuk menaiktaraf jalan tersebut pada masa kini memandangkan aliran trafik pada jalan sedia ada **masih lancar serta masih lagi mampu menampung kapasiti jalan sedia ada**.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DR. NIK MUHAMMAD ZAWAWI BIN HAJI
SALLEH

TARIKH : 15 NOVEMBER 2018

SOALAN :

Dr. Nik Muhammad Zawawi bin Haji Salleh [Pasir Puteh] minta **MENTERI TENAGA MANUSIA** menyatakan apakah langkah yang telah diambil oleh Kementerian dalam membangunkan kemahiran kemanusiaan/insaniah dan modal insan berperibadi mulia ke arah mewujudkan pekerja mahir dan pekerja separuh mahir yang lebih berketrampilan dan apakah pelan pembangunan pekerja asing yang banyak mendatangkan implikasi negatif dalam kehidupan masyarakat Malaysia.

PR-1412-L02212

JAWAPAN

Tuan Yang Di Pertua,

1. Dalam usaha membangunkan pekerja mahir dan pekerja separuh mahir yang berketrampilan, Kerajaan sentiasa dari semasa ke semasa mengambil langkah untuk membantu pencari kerja tempatan dari segi:

- (i) kekosongan jawatan ditawarkan kepada pekerja tempatan terlebih dahulu melalui *Portal JobsMalaysia* sebelum permohonan pekerja asing dibenarkan;
- (ii) mempromosi dan memudah cara peluang penempatan pekerjaan melalui Program Penempatan Pekerjaan (3P) oleh Jabatan Tenaga Kerja untuk memberi keutamaan kepada pencari kerja tempatan;
- (iii) menggalakkan sektor-sektor berintensif buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing. Langkah ini dapat membantu negara mencapai sasaran melahirkan 35% pekerja mahir di Malaysia menjelang tahun 2020;

- (iv) memantapkan dasar TVET negara untuk warga tempatan bagi melahirkan individu berkemahiran tinggi;
- (iv) mempergiatkan lagi pelaksanaan Sistem Latihan *Dual* Nasional untuk menyediakan tenaga kerja mahir negara melalui kaedah latihan industri yang komprehensif dan terkini bagi memastikan kemahiran tenaga kerja dipertingkatkan; dan
- (vi) pembiayaan latihan di bawah Pembangunan Sumber Manusia Berhad melalui caruman levi majikan untuk melatih semula pekerja bagi meningkatkan kemahiran pekerja terutamanya dalam sektor pembuatan, pembinaan dan perlombongan.

2. Berkenaan dengan pelan pembangunan pekerja asing dari aspek pekerjaan, pengambilan pekerja asing tidak mempengaruhi kadar pengangguran warganegara Malaysia kerana pada masa ini kadar pengangguran di Malaysia ialah 3.4% yang ditakrifkan sebagai guna tenaga penuh, iaitu tidak melebihi 4%. Pada masa yang sama Kerajaan juga telah menjalankan pelbagai inisiatif dalam mengurangkan kebergantungan kepada pekerja asing dan keutamaan kepada pekerja tempatan dalam pasaran pekerjaan negara seperti berikut:

- (i) menetapkan had penggajian pekerja asing di Malaysia tidak melebihi 15% daripada jumlah guna tenaga pada

tahun 2020 sepertimana yang dinyatakan dalam Rancangan Malaysia ke-11;

- (ii) penggajian pekerja asing diluluskan kepada 7 sektor sahaja iaitu, sektor pembinaan, pertanian, perladangan, perkilangan dan perkhidmatan (sub sektor tukang masak restoran, pekerja pembersihan dan pencucian, pekerja *resort* pulau peranginan, hotel, kedi, spa,urut kaki, pembantu taman tema haiwan, kargo (pelabuhan dan lapangan terbang) dan perlombongan yang melibatkan pekerjaan asas serta pekhidmat domestik;
- (iii) hanya majikan berkeupayaan (*genuine*) dan mematuhi standard perburuhan seperti pematuhan gaji minimum, menyediakan kemudahan kediaman berserta kemudahan asas dan tiada rekod pelanggaran kes buruh sahaja dipertimbangkan memohon pekerja asing. Keupayaan majikan ditentukan melalui proses saringan dan pemeriksaan JTK;
- (iv) menggalakkan sektor-sektor berintensif buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing. Langkah ini dapat membantu negara mencapai sasaran melahirkan 35% pekerja mahir di Malaysia menjelang tahun 2020;

- (v) menetapkan *ratio* pekerja warganegara dan pekerja asing bagi menjamin peluang pekerjaan kepada rakyat Malaysia. Sebagai contoh, sektor perladangan (kelapa sawit), keluasan tanah 8 hektar untuk 1 pekerja dan getah pula keluasan tanah 4 hektar untuk 1 pekerja. Manakala, untuk sektor perkilangan, bagi syarikat dalam sub sektor elektrik dan elektronik, nisbah kelayakan yang ditetapkan adalah 2 pekerja warganegara bagi 1 pekerja asing;
- (vi) pelaksanaan Surat Aku Janji Majikan (*Employers Undertaking*) mulai 1 Januari 2017 yang mengehendaki majikan bertanggung jawab sepenuhnya terhadap pekerja asingnya bermula dari peringkat kemasukan, penggajian sehinggalah penghantaran pulang pekerja tersebut ke negara asal;
- (vii) mengutamakan *exit policy* penggajian pekerja asing dengan menyediakan pelan latihan kemahiran kepada pekerja warganegara, memberi keutamaan kepada mekanisme IBS dalam sektor pembinaan, restoran berkonsepkan *self service* dan sebagainya; dan
- (viii) Kerajaan juga akan melaksanakan kajian mengenai kadar baharu bayaran levi secara progresif mengikut bilangan pekerja asing. Pelaksanaan mekanisme ini dijangka akan mengurangkan kebergantungan industri terhadap pekerja asing dan menggalakkan peralihan industri ke arah

mekanisasi dan automasi.

3. Dalam usaha membendung isu kesihatan dan keselamatan, Kerajaan juga melalui Kementerian Dalam Negeri telah melaksanakan saringan keselamatan dan saringan kesihatan di negara sumber sebagai tapisan awal untuk mengelakkan kemasukan pekerja-pekerja asing yang mempunyai potensi atau risiko terlibat dalam keganasan serta membawa masuk penyakit ke Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. SANTHARA
[SEGAMAT]**

TARIKH : 15 NOVEMBER 2018 (KHAMIS)

SOALAN NO.9

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan mengapakah kilang kelapa sawit bersebelahan bandar Jementah masih dibenarkan beroperasi walaupun mereka gagal mematuhi terma dan syarat sepertimana dalam kelulusan operasi sementara mahupun cadangan yang diberikan oleh Kementerian sendiri. Apakah jalan penyelesaian jangka panjang Kerajaan dalam menangani masalah ini?

JAWAPAN

Tuan Yang di-Pertua,

Kilang sawit Milik Mestika Sdn Bhd tersebut beroperasi dengan lesen yang dikeluarkan oleh pelbagai agensi berkaitan seperti Jabatan Alam Sekitar (JAS), Lembaga Minyak Sawit Malaysia (MPOB), Pihak Berkuasa Tempatan berkaitan dan sebagainya. Kementerian melalui JAS akan sentiasa memantau operasi kilang tersebut dari segi pematuhan kepada Syarat-Syarat Lesen.

Pemeriksaan terkini pada 2 Oktober 2018 mendapati kilang kelapa sawit milik Mestika Sdn Bhd di Jementah telah menggunakan kolam sedia ada untuk pengitaran semula efluen dari operasi kilang tersebut. Pemeriksaan pada 16 Julai 2018 juga telah mendapati bahawa kedua-dua pelepasan efluen dan *particulate matter* adalah di bawah had yang ditetapkan dalam Syarat-Syarat Lesen dan Akta 172. Antara tindakan yang telah diambil atas pihak kilang ialah:

- (i) Dari segi **kawalan pencemaran efluen**, JAS telah mensyaratkan pelepasan parameter Keperluan Oksigen Biokimia (BOD_3) yang ketat ke alur air atau sungai berkenaan yang mengalir masuk ke Sungai Muar dengan nilai batas kurang daripada 20 miligram per liter. Untuk memastikan pematuhan kepada nilai batas tersebut, pihak premis telah memasang sistem kolam rawatan efluen perindustrian (IETS) dengan *Membrane Bio Reactor* (MBR) sebagai rawatan akhir sebelum pelepasan efluen ke alur air/sungai.

Walaupun begitu, premis ini diminta untuk menjernihkan efluen dengan sistem pengolahan yang lebih maju. Pihak kilang telah pun bersetuju untuk melaksanakannya seperti yang telah dibincangkan semasa perjumpaan pihak kilang bersama dengan Yang Berhormat Segamat, Wakil Ahli Dewan Undangan Negeri Jementah, JAS, Majlis Perbandaran Segamat dan Majlis Daerah Tangkak pada 19 Ogos 2018.

- (ii) Dari segi **kawalan pencemaran bau**, JAS Johor telah mensyaratkan pemasangan *biogas plant*. Pihak premis telah memberi komitmen untuk menyiapkan pemasangan sebelum akhir tahun 2018. Peratus kemajuan kerja sehingga Oktober 2018 adalah 75%. Sistem tersebut adalah untuk memerangkap gas-gas rumah kaca yang terbebas daripada kolam-kolam IETS dan seterusnya untuk penjanaan kuasa elektrik. Sistem ini juga dapat mengawal masalah pencemaran bau.
- (iii) Dari segi **kawalan pencemaran asap hitam**, JAS telah mensyaratkan pematuhan nilai batas pelepasan *particulate matter* (PM) 150 miligram per normal meter padu (mg/Nm³) dari cerobong sistem alat dandang (*biomass boiler*). Pihak premis telah memasang Sistem Kawalan Pencemaran Udara (APCS) jenis *venturi scrubber and swirl* untuk mematuhi nilai batas tersebut. Premis juga telah memasang *Continuous Emission Monitoring System* (CEMS) bagi membolehkan Jabatan Alam Sekitar memantau pelepasan asap hitam secara *online*/berterusan.

Untuk jangka masa panjang, bagi memastikan sistem IETS dan APCS beroperasi dengan lebih berkesan dan dapat mematuhi lesen, premis tersebut telah diarah untuk melaksanakan pematuhan sendiri (*self-compliance / guided self regulation*) dengan pemantauan prestasi sistem alat kawalan tersebut oleh orang berwibawa (*competent person*) yang ditauliahkan oleh JAS. Di samping itu, Kementerian melalui JAS akan terus sentiasa memantau operasi kilang tersebut dari segi pematuhan kepada Akta Kualiti Alam Sekeliling 1974 dan peraturan-peraturan yang berkaitan bagi memenuhi Syarat-Syarat Lesen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' MOHD NIZAR BIN HAJI
ZAKARIA [PARIT]**

TARIKH : 15 NOVEMBER 2018

SOALAN :

Minta **MENTERI PELANCONGAN, SENI DAN BUDAYA** menyatakan
:-

- a) apakah usaha berterusan yang akan dilaksanakan oleh Kementerian bagi mempromosikan sektor pelancongan khususnya di kawasan Perak Tengah dan adakah Kementerian melaksanakan kolaborasi bersama pengusaha industri seperti inap desa bagi mempromosikan kawasan pelancongan tertentu; dan
- b) apakah bentuk bantuan yang telah diberikan oleh Kementerian kepada pengusaha inap desa dalam mempromosikan sesuatu kawasan pelancongan

JAWAPAN :

Tuan Yang di-Pertua,

Untuk makluman Ahli Yang Berhormat, Kementerian Pelancongan, Seni dan Budaya melalui Tourism Malaysia (TM) bersama-sama dengan Kerajaan Negeri Perak telah merancang dan melaksanakan strategi dan program promosi untuk merancak serta memperkenalkan lagi produk-produk pelancongan baru yang berpotensi untuk diketengahkan ke peringkat domestik dan antarabangsa.

Strategi dan agenda mengklusterkan produk pelancongan kepada tujuh (7) kawasan kluster pelancongan di Negeri Perak telah dilaksanakan bertujuan untuk memastikan potensi produk pelancongan yang menarik di setiap daerah dapat ditonjolkan.

Semasa Tahun Melawat Negeri Perak 2017, Kementerian Pelancongan, Seni dan Budaya melalui TM dan Kerajaan Negeri Perak telah mempromosikan produk pelancongan di Parit di bawah daerah pelancongan Perak Tengah. Promosi dan pembangunan pakej yang telah dilaksanakan adalah seperti berikut:

1. Pembangunan pakej dan promosi melalui Homestay Kampung Pendi. Melalui pakej ini, pelancong berpeluang merasai sendiri pengalaman serta keunikan budaya, keenakan makanan dan berpeluang mencuba aktiviti kehidupan sebenar masyarakat setempat di sekitar kawasan homestay termasuk di kawasan Parit. Turut diusahakan adalah penyertaan di pameran homestay oleh Homestay Kg. Pendi, Homestay Maju Manik dan FELCRA Seberang Perak di Bagan Datuk, Perak anjuran Kementerian Kewangan Malaysia pada 19 November 2017;
2. Pembangunan pakej dan promosi melalui agensi – agensi pelancongan di Negeri Perak. Melalui inisiatif ini, pakej Perak *Food Trail* telah dihasilkan dan juga dipromosikan yang mana ianya turut meliputi destinasi jejak makanan di kawasan Parit;

NO. SOALAN: 10

3. Kementerian turut mengambil maklum usaha kerajaan Negeri Perak dan pihak berkuasa tempatan untuk menceriakan lagi sekitar kawasan Parit dengan mewujudkan Lukisan Mural Jalanan dan menambahbaik Taman Cempaka Sari yang mampu memberikan impak bagi menarik minat pelancong domestik untuk mengunjungi sekitar kawasan Parit; dan
4. Kementerian turut mengetengahkan produk-produk pelancongan di Parit sempena acara-acara pelancongan negeri yang mana ianya mampu meningkatkan lagi kedatangan pelancong ke Negeri Perak secara umumnya dan ke Parit secara khususnya.

Tuan Yang di-Pertua,

Inap desa atau lebih dikenali sebagai homestay merupakan salah satu daripada produk pelancongan desa yang terdapat di Malaysia yang turut mendapat perhatian pelancong antarabangsa. Sejak kebelakangan ini segmen pelancongan tersebut menjadi amat berpotensi dan menyumbang kepada pembangunan sosioekonomi terutamanya bagi masyarakat luar bandar.

Kementerian Pelancongan, Seni dan Budaya Malaysia dan TM sentiasa memberikan bantuan dan mengadakan kolaborasi serta kerjasama dengan pengusaha-pengusaha homestay dalam mempromosikan aktiviti/kemudahan yang ditawarkan oleh homestay melalui inisiatif-inisiatif seperti berikut:

1. Kursus Intensif Pemasaran Homestay melalui Media Sosial dengan kerjasama Pusat Pembangunan Modal Insan (PHCDC) Perak bersama Persatuan Homestay Negeri Perak pada 11 hingga 12 Oktober 2017;
2. Program *Visit My Kampung* bersama Politeknik Ungku Omar dan Pelajar Antarabangsa di Homestay Maju Manik, Teluk Intan pada 13 hingga 14 Ogos 2017;

NO. SOALAN: 10

3. Melalui pelaksanaan program *Mega-Fam (Mega Familiarization)* dengan mempelawa wakil-wakil media dan para pengusaha pelancongan antarabangsa untuk menyertai acara-acara dan program-program pelancongan homestay supaya ia dapat dipromosikan di luar negara;
4. Publisiti dan promosi dalam media sosial serta digital seperti klip video promosi pelancongan “Malaysia Truly Asia”;
5. Pengiklanan yang memaparkan imej-imej menarik homestay Malaysia di promosi dalam negara dan luar negara;
6. Mencetak risalah homestay untuk kegunaan para pelancong;
7. Penganjuran Seminar/Taklimat homestay di Sekolah-sekolah dan Universiti-universiti yang telah dikenalpasti sentiasa diadakan dari semasa ke semasa; dan
8. Pada masa yang sama, beberapa sesi engagement/taklimat berkaitan homestay juga diadakan bersama sektor swasta/pengusaha industri tempatan bagi mendapatkan sokongan/kerjasama mereka dalam membangunkan dan mempromosikan pakej-pakej homestay.

Di samping itu, Kementerian juga memberikan bantuan menaik taraf kemudahan guna sama (infrastruktur asas) di perkampungan homestay yang berdaftar untuk keselesaan dan kepuasan para pelancong yang menginap di homestay, melaksanakan program dan aktiviti homestay dengan kerjasama agensi Kerajaan di bawah Kerajaan negeri serta di peringkat Persekutuan dan mengadakan usaha berterusan meningkatkan pembangunan keupayaan pengusaha homestay melalui kursus dan latihan bagi memastikan kualiti perkhidmatan homestay yang optimum diberikan dan menawarkan pakej-pakej homestay yang menarik seperti kursus pembangunan pakej, pemasaran melalui media sosial, pengendalian makanan dan komunikasi homestay.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : PUAN NOORITA BINTI SUAL [TENOM]

TARIKH : 15 NOVEMBER 2018 (KHAMIS)

SOALAN : 11

PR-1412-L01867

Puan Noorita binti Sual [Tenom] minta **MENTERI KOMUNIKASI DAN MULTIMEDIA** menyatakan status perkembangan terkini pembinaan menara telekomunikasi di daerah Kecil Kemabong dan adakah pembinaannya telah mencapai tahap yang memuaskan untuk dinikmati oleh penduduk sama seperti yang dinikmati oleh rakyat Malaysia di tempat yang lain.

JAWAPAN:

Tuan Yang di-Pertua,

1. Untuk makluman Ahli Yang Berhormat, sehingga kini sebanyak 11 menara komunikasi baharu telah dibina dan beroperasi di Parlimen Tenom termasuk 5 menara yang terletak di daerah Kemabong. Ini merupakan tambahan kepada 15 menara komunikasi yang telah dibangunkan secara komersial di Parlimen Tenom.
2. Bagi memastikan Parlimen Tenom terutamanya di daerah Kemabong tidak ketinggalan dalam menikmati perkhidmatan jalur lebar, terdapat tambahan 8 menara baharu yang sedang dibina bagi penyediaan liputan 3G di Parlimen Tenom yang mana 5 daripada menara tersebut adalah juga terletak di daerah Kemabong manakala 5 lokasi menara lagi sedang dalam penaiktarafan dan dijangka siap menjelang suku pertama 2019.
3. Selain itu, terdapat 16 menara komunikasi yang dibina secara komersial oleh pemberi perkhidmatan di Parlimen Tenom dimana 9 lokasi menara terdapat di kawasan Kemabong.
4. Di samping itu, satu ibusawat akan dinaiktaraf bagi menyediakan liputan jalur lebar talian tetap di sebahagian kawasan Parlimen Tenom yang dijangka akan siap sepenuhnya pada tahun 2019.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN ROBERT LAWSON CHUAT
[BETONG]
TARIKH : 15 NOVEMBER 2018 (KHAMIS)

SOALAN NO. 12

Minta **MENTERI KESIHATAN** menyatakan:

- (a) apakah perancangan Kerajaan untuk menaiktaraf Hospital Daerah Betong kepada tahap hospital daerah dengan kemudahan doktor pakar; dan
- (b) apakah tindakan Kementerian bagi mengatasi masalah doktor pakar yang tidak suka bertugas di luar Bandar.

JAWAPAN

Yang di-Pertua,

Hospital Betong merupakan sebuah hospital tanpa pakar dengan kapasiti 48 buah katil. Kadar penggunaan katil (BOR) di Hospital Betong pada tahun 2015 adalah sebanyak 44.12% dan 50.49% pada tahun 2016.

Pada masa ini, tiada lagi perancangan untuk menaiktaraf Hospital Betong sebagai sebuah hospital berpakar. Namun begitu, bagi memudahkan pesakit mendapatkan akses kepada perkhidmatan kepakaran, perkhidmatan lawatan pakar secara berkala telah dijalankan di Hospital Betong di dalam 6 bidang kepakaran iaitu:

- i. obstetrik dan ginekologi (setiap minggu);
- ii. pediatrik (setiap bulan);
- iii. psikiatri (setiap bulan);
- iv. ortopedik (setiap 2 bulan);
- v. pembedahan am (setiap 2 bulan); dan
- vi. oftalmologi (setiap 4 bulan untuk kes selepas pembedahan dan setiap 6 bulan untuk kes biasa)

Terdapat perancangan untuk memulakan khidmat lawatan pakar dalam bidang perubatan am seawalnya akhir tahun. Namun perancangan ini bergantung kepada sumber tenaga kepakaran yang mencukupi. KKM sentiasa prihatin dan berusaha agar semua penduduk mendapat perkhidmatan perubatan yang setara.

Yang di-Pertua,

Antara usaha yang telah diambil oleh KKM untuk menempatkan lebih ramai doktor pakar di hospital luar bandar adalah seperti berikut:

- i. Meningkatkan pengambilan Pegawai Perubatan menjalani program sarjana kepakaran kepakaran dengan Hadiah Latihan

NO SOALAN: 12

Persekutuan daripada 800 slot sehingga tahun 2014 kepada 1,000 slot mulai tahun 2015;

- ii. Memantapkan program laluan paralel bagi menambahkan lagi bilangan pakar;
- iii. Melantik Pegawai Perubatan Pakar warga asing untuk berkhidmat secara kontrak dengan KKM mengikut keperluan;
- iv. Melantik semula secara kontrak Pegawai Perubatan Pakar warganegara yang telah bersara wajib untuk berkhidmat dengan KKM mengikut keperluan;
- v. Mendapatkan perkhidmatan kepakaran dari pihak swasta untuk berkhidmat secara sessional; dan
- vi. Menggalakkan Pegawai Perubatan Pakar warganegara Malaysia yang berkhidmat di luar negara untuk pulang ke tanah air.

Selain itu, bagi menggalakkan lebih ramai doktor pakar ditempatkan di Sarawak, Kerajaan telah menetapkan supaya penempatan doktor pakar dibuat secara giliran di mana tempoh penempatan minima adalah selama 6 bulan. Pada masa ini, tempoh penempatan tersebut telah dipanjangkan kepada 1 tahun bagi memastikan kesinambungan perkhidmatan kepakaran di hospital berkenaan.

Kerajaan juga telah melaksanakan beberapa inisiatif untuk meningkatkan serta menggalakkan doktor pakar berkhidmat di hospital Kerajaan di luar bandar termasuklah di negeri Sarawak seperti:

- i. Bayaran Insentif Wilayah bagi pegawai di Sarawak atas kadar peratusan 12.5 hingga 25 peratus daripada gaji bulanan;
- ii. Elaun Khas Mengikut Lokasi dan Tahap Kesusahan (EKMLTK) kepada Pegawai Perubatan yang berkhidmat di fasiliti kesihatan di kawasan pedalaman Sarawak yang diluluskan, atas kadar RM500

NO SOALAN: 12

atau RM1000 atau RM1500 berdasarkan kategori pedalaman fasiliti tersebut;

- iii. Bayaran Insentif Pedalaman bagi pegawai di Sarawak atas kadar 10 peratus dari gaji bulanan;
- iv. Bayaran Insentif Pegawai Perubatan Pakar di Sabah, Sarawak dan Wilayah Persekutuan Labuan berkuatkuasa 1 Julai 2016;
- v. Bayaran Insentif Penempatan Pakar Perubatan di Fasiliti Kesihatan Di Sabah dan Sarawak; dan
- vi. Pegawai Perubatan yang berkhidmat di Sarawak diberi merit 5% markah tambahan dalam markah keseluruhan bagi pemilihan calon yang akan menjalani latihan kepakaran untuk Program Sarjana Perubatan.

Untuk Pegawai Perubatan yang terlibat dalam pasukan Perkhidmatan Perubatan Udara layak diberikan Bayaran Insentif Perudara sebanyak RM30 bagi satu penerbangan pergi dan balik.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : YB PUAN NURUL IZZAH BINTI ANWAR
[PERMATANG PAUH]
TARIKH : 15 NOVEMBER 2018 (KHAMIS)

SOALAN NO. 13

Minta **MENTERI KESIHATAN** menyatakan:

- a) tahap keberkesanan program pemulihan dadah agensi Kementerian berdasarkan prinsip 'harm reduction'; dan
- b) sama ada pihak Kementerian membuat sebarang perbandingan dengan negara luar yang meminda undang-undang untuk membolehkan penggunaan minyak kanabis sebagai penawar penyakit.

JAWAPAN

Yang di-Pertua,

Kerajaan telah melaksanakan rawatan Methadone yang merupakan salah satu komponen utama pengurangan mudarat (*harm reduction*) pada Oktober 2005. Objektif pelaksanaan rawatan methadone ini adalah untuk mengekang jangkitan HIV di kalangan penagih dadah suntikan dan juga untuk merawat penagihan opiate.

Pelaksanaan rawatan methadone ini dan amnya program pengurangan mudarat telah berjaya mengurangkan jangkitan HIV/AIDS di Malaysia, meningkat kualiti kehidupan pesakit dan mengurangkan kemasukan ke pusat tahanan.

Berdasarkan surveilan, kes jangkitan baru HIV/AIDS akibat penagihan dadah suntikan yang dilaporkan ke KKM setiap tahun telah menurun dari 79.6% pada tahun 2001 kepada 3.4% pada tahun 2017. Ini juga telah menyumbang kepada penurunan keseluruhan kes baru jangkitan HIV/AIDS di Malaysia. Kadar notifikasi kes HIV/AIDS baru telah menurun dari 23.4 bagi setiap 100,000 penduduk pada tahun 2005 kepada 10.3 bagi setiap 100,000 penduduk pada tahun 2017.

Kajian *integrated bio behavioural surveillance* yang dilaksanakan oleh Kementerian Kesihatan Malaysia secara berkala sejak 2009 juga telah menunjukkan penurunan prevalen jangkitan HIV/AIDS di kalangan penagih dadah suntikan dan tren ini sepadan dengan surveilan / pemantauan penyakit yang dilaksanakan setiap tahun. Prevalen jangkitan HIV di kalangan penagih dadah suntikan telah menurun dari 22.1% pada tahun 2009 kepada 18.9% pada 2012, 16.3% pada 2014 dan 13.4% pada tahun 2017.

Rawatan methadone ini juga telah berjaya meningkatkan kualiti kehidupan pesakit. Tahap kesihatan mereka menjadi lebih baik, ketrampilan diri menjadi lebih baik, berkeyakinan diri lebih tinggi dan mampu berkomunikasi dengan baik dengan masyarakat selepas

mereka mendapatkan rawatan. Malahan mereka yang menjalani rawatan methadone ini mampu untuk mendapatkan dan menjalankan pekerjaan tetap berbanding sebelum menjalankan rawatan.

Kajian myTOS pada 2016 telah membuktikan bahawa rawatan methadone telah berjaya mengurangkan kemasukan ke pusat tahanan. Peratusan kemasukan ke penjara telah menurun dari 57% (sebelum rawatan) kepada 9.1% (selepas rawatan) manakala peratusan kemasukan ke pusat pemulihan menurun dari 27.6% (sebelum rawatan) kepada 1.6% (selepas rawatan). Kadar *recidivism* (kemasukan berulang/semula) ke penjara di kalangan mereka yang terlibat dalam rawatan methadone juga menurun sebanyak 52.1%.

Dari aspek kos, satu kajian yang telah dijalankan *Centre of Excellence for Research in AIDS (CERIA)*, Pusat Perubatan Universiti Malaya (UMMC) dan Bank Dunia pada 2012/2013 menunjukkan bahawa pendekatan pengurangan mudarat (harm reduction) meliputi kedua-dua rawatan methadone dan program pertukaran jarum dan alat suntikan telah terbukti berkesan dari segi kos (*cost effective*). Dalam tempoh 2006-2013, program ini telah dapat mengurangkan sebanyak 12,653 jangkitan HIV dan menjimatkan kos penjagaan kesihatan sebanyak RM 47.06 juta. Adalah dijangkakan sebanyak 103,717 jangkitan HIV akan dapat dielakkan sepanjang tempoh 2006 sehingga 2050 dengan penjimatan kos penjagaan kesihatan sebanyak RM 909.47 juta.

Yang di-Pertua,

Kementerian ini mengambil maklum bahawa terdapat negara luar yang meminda undang-undang untuk membenarkan penggunaan hasil kanabis. Negara tersebut adalah Uruguay, yang telah meluluskan akta kanabis pada tahun 2013 dan Canada, yang mana akta kanabis telah berkuatkuasa.

Minyak kanabis merupakan bahan yang diekstrak daripada tumbuhan kanabis iaitu *Cannabis Sativa*. Tumbuhan kanabis dan ekstrak daripadanya merupakan dadah berbahaya yang dikawal di bawah Akta

Dadah Berbahaya 1952 [Akta 234]. Akta 234 memperuntukkan kawalan antaranya ke atas pengimportan, pengeksportan, pengilangan, penjualan dan pemilikan dadah berbahaya. Aktiviti-aktiviti tersebut, boleh dijalankan sekiranya mengikut peruntukan yang ditetapkan dalam Akta 234 atau Peraturan-peraturannya.

Bagi Akta racun 1952 [Akta 366] pula, terdapat kawalan khas Bahan-bahan psikotropik ke atas aktiviti pengimportan, penjualan, pembekalan, pemilikan dan penggunaannya di bawah Peraturan-peraturan Racun (Bahan-bahan Psikotropik) 1989.

Yang di-Pertua,

Selain itu, persediaan (ubat) untuk tujuan perubatan adalah dikawal di bawah Akta Jualan Dadah 1952 yang mana semua ubat yang ingin dipasarkan di Malaysia perlu didaftarkan oleh Pihak Berkuasa Kawalan Dadah (PBKD) di bawah Peraturan-peraturan Kawalan Dadah dan Kosmetik 1984. Hanya ubat yang terbukti selamat, berkualiti dan berkesan sahaja yang akan didaftarkan.

Cadangan pelaksanaan supaya minyak kanabis boleh didaftarkan dan seterusnya dipasarkan di Malaysia boleh dipertimbangkan sekiranya terdapat data-data *clinical* dan *non-clinical* yang membuktikan minyak kanabis adalah selamat, berkualiti dan berkesan dalam rawatan apa-apa penyakit. Pada masa kini, terdapat banyak ubat mengandungi dadah berbahaya yang telahpun berdaftar dan dipasarkan di Malaysia contohnya ubat mengandungi fentanyl, morphine dan pethidine.

Sehubungan itu, tiada keperluan untuk Malaysia membandingkan undang-undang dengan negara yang terlibat memandangkan undang-undang sedia ada di negara ini adalah mencukupi untuk menyekat atau membenarkan penggunaan minyak kanabis sebagai penawar penyakit.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. SHAHIDAN BIN KASSIM
[ARAU]**

TARIKH : 15 NOVEMBER 2018 (KHAMIS)

SOALAN NO.14

Minta **MENTERI PENDIDIKAN** menyatakan mengapakah dilantik orang-orang yang berkepentingan politik sebagai ahli lembaga pengarah universiti-universiti awam yang nampaknya bertentangan dengan manifesto Pakatan Harapan yang pada awalnya menjamin kebebasan universiti dari pengaruh politik sebagai contoh kes di UIAM dan UUM.

JAWAPAN

Tuan Yang di-Pertua,

Untuk makluman Ahli Yang Berhormat, pelantikan Ahli Lembaga Pengarah Universiti (LPU) adalah berdasarkan kepada kriteria yang ditetapkan oleh Kementerian di mana calon perlu mempunyai pengalaman yang luas dan pakar dalam bidang ekonomi, undang-undang, kewangan, pendidikan dan industri serta aktif dalam seminar-seminar dalam dan luar negara.

Pada masa yang sama, ahli politik yang dilantik sebagai LPU merupakan komposisi wakil masyarakat selari dengan peruntukan perlembagaan sesebuah Universiti Awam bahawa ahli lembaga pengarah yang mewakili komposisi wakil masyarakat adalah “seorang yang mewakili masyarakat di tempat terletaknya Universiti itu”. Isu pelantikan berdasarkan pengaruh politik tidak timbul sama sekali. Kementerian Pendidikan amat telus dan jelas dalam pelantikannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATIN PADUKA DR. TAN YEE KEW
[WANGSA MAJU]
TARIKH : 15 NOVEMBER 2018 (KHAMIS)

SOALAN NO. 15

Y.B. DATIN PADUKA DR. TAN YEE KEW [WANGSA MAJU] minta **MENTERI KEWANGAN** menyatakan pendekatan baru Kerajaan dalam mengawal selia pengurusan GLC bagi memastikan prestasi buruk yang dialami oleh 1Malaysia Development Berhad (1MDB), Felda Global Ventures (FGV), TH Heavy Engineering Berhad (THHE) dan sebagainya tidak berulang lagi. Apakah Kerajaan akan membuat siasatan bebas bagi mencari punca sebenar kerugian yang begitu besar berlaku dalam setiap GLC ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan sebagai pemegang saham syarikat milik Kerajaan dan syarikat berkaitan Kerajaan (GLC) sentiasa menambah baik proses kawalan dalaman dan mengguna pakai amalan tadbir urus terbaik dalam operasinya. Pihak Kerajaan melalui Menteri Kewangan Diperbadankan (MKD) akan memastikan syarikat sentiasa beroperasi selaras dengan objektif penubuhan dan mandat yang telah ditetapkan berdasarkan;

1. Pelan perniagaan (*business plan*) tahunan syarikat;
2. Sasaran *Key Performance Indicators* (KPI) syarikat dan laporan pencapaian KPI setiap suku tahun;
3. Penyata Kewangan Beraudit Tahunan;
4. Laporan Pengurusan Suku Tahun; dan
5. Perbincangan dengan syarikat dari semasa ke semasa.

Sebagai sebahagian usaha menambahbaik tadbir urus syarikat Kerajaan, tiada lagi pelantikan Ahli Politik dalam syarikat-syarikat Kerajaan dan pelantikan dibuat berdasarkan merit dengan mengambil kira kelayakan profesional, pengalaman serta kemahiran yang bersesuaian dengan operasi dan bidang syarikat yang berkaitan. Pelantikan Ahli Lembaga Pengarah yang bukan terdiri daripada ahli politik akan dapat menjadikan pimpinan pengurusan lebih kompeten dan profesional serta menjurus ke arah tadbir urus korporat yang mementingkan prestasi kewangan, hasil pelaburan serta menggalakkan pihak swasta menceburi diri agar mengurangkan kesan negatif "*crowding-out*" effect.

Selain itu, MKD juga telah mengambil inisiatif dengan memperkenalkan *Corporate Improvement Programme* (CIP) dimana syarikat-syarikat MKD yang tidak mencapai target KPI sekurang-kurangnya 80% pada tahun semasa, hendaklah mengemukakan penjelasan lanjut dan pelan tindakan

yang akan dilaksanakan oleh syarikat pada masa hadapan.

Bagi memastikan tadbir urus entiti milik Kerajaan dapat ditambah baik, Kerajaan baharu juga akan mengambil pendekatan untuk mengamalkan konsep *Competency, Accountability dan Transparency* (CAT) di dalam pentadbiran Kerajaan malah satu rangka perundangan yang komprehensif akan digubal untuk menambah baik kawal selia syarikat Menteri Kewangan Diperbadankan (MKD), Syarikat Pelaburan Berkaitan Kerajaan (*Government Linked-Investment Companies*- GLIC), Syarikat Berkaitan Kerajaan (*Government Linked Companies*- GLC), Badan Berkanun Persekutuan (BBP) dan Syarikat Terhad Dengan Jaminan (CLBG).

Di samping itu, pengasingan peranan (*segregation of duties*) akan diberi penekanan dalam mentadbir urus entiti Kerajaan. Pengasingan peranan antara Lembaga Pengarah dan pengurusan operasi telah pun diamalkan oleh MKD/ GLC/ BBP dan CLBG sebelum ini sebagai amalan tadbir urus korporat yang baik, yang mana merupakan sebahagian daripada keperluan untuk *check and balance*.

Jawatankuasa siasatan bebas hanya akan ditubuhkan berdasarkan keperluan sekiranya terdapat isu-isu yang melibatkan syarikat Kerajaan. Buat masa ini, Pasukan Khas Siasatan 1MDB yang diketuai oleh bekas Peguam Negara, Tan Sri Abdul Gani Patail telah pun ditubuhkan bagi menyiasat skandal 1MDB.

Selain daripada siasatan bebas, agensi Kerajaan lain yang berautoriti seperti Suruhanjaya Pencegahan Rasuah Malaysia (SPRM) juga turut terlibat dalam menyiasat isu salah laku dan tadbir urus yang menyumbang kepada kerugian sesebuah syarikat GLC.

Kerajaan mengambil maklum kepentingan peranan yang dimainkan oleh Syarikat-syarikat Kerajaan sama ada Syarikat Berkaitan Kerajaan (GLC) dan Syarikat Pelaburan Berkaitan Kerajaan (GLIC) termasuk syarikat Menteri

NO SOALAN : 15

Kewangan (Diperbadankan) (MKD) dalam menentukan hala tuju pembangunan ekonomi negara, maka Kerajaan sentiasa komited untuk melaksanakan tadbir urus yang baik berdasarkan prinsip cekap, akauntabel, dan telus (CAT) bagi meningkatkan kecekapan dan keberkesanan operasi syarikat.

SOALAN NO : 16

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN ANYI NGAU

KAWASAN : BARAM

TARIKH : 15 NOVEMBER 2018, KHAMIS

SOALAN :

YB TUAN ANYI NGAU minta **MENTERI KERJA RAYA** menyatakan rancangan Kementerian untuk membina jalan/laluan alternatif Lebuhraya Pan Borneo tanpa melalui negara jiran Brunei. Nyatakan laluan, jarak, jenis jalan serta kos pembinaan jalan berkenaan seperti yang diumumkan pihak Kementerian kebelakangan ini.

JAWAPAN :

Tuan Yang Di-Pertua,

Sebagaimana Ahli Yang Berhormat sedia maklum, hasil lawatan YAB. Perdana Menteri dan perbincangan beliau dengan Kerajaan Negara Brunei Darussalam pada 2 September hingga 3 September 2018, Kerajaan secara prinsip telah bersetuju untuk meminda jajaran Fasa 2 Lebuhraya Pan Borneo Sarawak kepada satu jajaran alternatif yang tidak melalui Negara Brunei Darussalam. Sehubungan itu Kementerian kini sedang menjalankan penelitian teknikal dan kewangan bagi laluan tersebut yang tidak melalui Negara Brunei Darussalam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' ABDULLAH SANI
BIN ABDUL HAMID
[KAPAR]**

TARIKH : 15 NOVEMBER 2018 (KHAMIS)

SOALAN NO. 17

Minta **MENTERI PERUMAHAN DAN KERAJAAN TEMPATAN** menyatakan **langkah yang diambil untuk membanteras kilang-kilang haram** yang merugikan dari segi menambahkan pendapatan negara.

JAWAPAN

Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) memandang serius kewujudan kilang-kilang yang beroperasi secara haram. Pihak Berkuasa Tempatan (PBT) boleh mengambil tindakan melalui peruntukan di bawah Seksyen 72, Akta Jalan, Parit dan Bangunan [Akta 133] iaitu Yang Dipertua (YDP) mempunyai kuasa untuk meruntuh atau memindahkan bangunan yang tidak dibenarkan. PBT juga telah diperuntukkan di bawah Seksyen 19 (1), Akta Perancangan Bandar dan Desa 1976, [Akta 172] iaitu larangan terhadap pemajuan tanpa kebenaran merancang di dalam kawasan operasi PBT. Peruntukan yang terdapat di dalam kedua-dua Akta ini jelas memberikan kuasa kepada YDP untuk mengambil tindakan dalam membanteras kewujudan kilang haram.
2. Untuk makluman Yang Berhormat juga, PBT mempunyai *Standard Operating Procedure* (SOP) dalam membenteras kilang-kilang haram. Contohnya di Negeri Selangor, terdapat Garis Panduan Penyeragaman Program Pemutihan Kilang Tanpa Kebenaran Negeri Selangor. Selain itu, di Negeri Pulau Pinang juga terdapat Garis Panduan Penguatkuasaan Binaan Tanpa Kebenaran PBT, Garis Panduan Penguatkuasaan Terhadap Binaan di Dalam Tanah Individu dan Garis Panduan Pemantauan Lesen-lesen premis.
3. PBT juga sentiasa mengadakan operasi penguatkuasaan dan turut bekerjasama dengan agensi-agensi Kerajaan yang lain seperti Jabatan Imigresen Malaysia, Jabatan Kastam Diraja Malaysia, Jabatan Alam Sekitar dan Suruhanjaya Perkhidmatan Air Negara dalam operasi penguatkuasaan bagi membanteras kewujudan kilang-kilang haram terutama jika melibatkan isu-isu pendatang asing tanpa izin dan pelupusan bahan sisa toksik dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAKARIA BIN MOHD. EDRIS
@ TUBAU [LIBARAN]**

TARIKH : 15.11.2018

SOALAN NO.18

Minta **MENTERI PENDIDIKAN** menyatakan jumlah projek naik taraf sekolah-sekolah luar bandar di Sabah dan Sarawak yang diluluskan oleh Kerajaan baharu, untuk meningkatkan kemajuan akademik rakyat di kedua-dua negeri.

JAWAPAN

Yang di-Pertua,

Untuk makluman Ahli Yang Berhormat, infrastruktur sekolah-sekolah di luar bandar sentiasa mendapat perhatian kerajaan melalui peruntukan-peruntukan yang diluluskan setiap tahun. Khusus untuk sekolah-sekolah luar bandar Sabah dan Sarawak, di bawah belanja pembangunan (DE) RMKe-11, peruntukan keseluruhan (kos projek) sebanyak RM2.298 bilion diperuntukkan untuk membiayai 67 projek yang diluluskan di bawah butiran Program Pembangunan Luar Bandar Sabah dan Sarawak.

Pelbagai skop kerja dilaksanakan untuk membaiki infrastruktur sekolah-sekolah di luar bandar di bawah butiran ini meliputi pembinaan bangunan gantian, gantian penuh, ubah suai naik taraf (USNT), pembangunan semula sekolah daif secara *Industrialised Building System* (IBS), projek bekalan air bersih di sekolah-sekolah luar bandar dan juga projek menyediakan bekalan elektrik 24 jam di sekolah-sekolah luar bandar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG TACK
[BENTONG]**

TARIKH : 15 November 2018 (KHAMIS)

SOALAN NO. 19

Minta **MENTERI PERTANIAN DAN INDUSTRI ASAS TANI** menyatakan langkah-langkah untuk memastikan pembangunan buah durian sebagai bahan eksport adalah mampan. Adakah Kementerian bercadang mengkaji kesan-kesan daripada peningkatan kawasan tanaman durian. Apakah rancangan Kementerian untuk mengembangkan industri hiliran untuk pekebun-pekebun durian.

JAWAPAN

Tuan Yang di-Pertua,

Langkah yang diambil oleh Kerajaan bagi memastikan pembangunan buah durian sebagai bahan eksport yang mampan adalah seperti berikut:

- i. Meneruskan pembangunan projek tanaman durian di bawah Rancangan Malaysia Ke-11 melalui Projek Pembangunan Kluster Durian, Projek Tanam Semula Buah-buahan Terpilih dan Program Khas Sumber Rezeki Baharu Durian yang bertujuan meningkatkan pengeluaran dan kualiti hasil ladang;
- ii. Menggalakkan pembukaan kawasan penanaman durian baharu secara perladangan dengan penglibatan syarikat swasta;
- iii. Memperkasakan program latihan kepada petani dengan mengadakan kursus dan latihan *hands on* bagi meningkatkan ilmu pengusaha mengenai pengurusan amalan pertanian baik durian supaya produktiviti ladang dapat dipertingkatkan ke arah memperoleh pensijilan kualiti seperti myGAP; dan
- iv. Memastikan semua fasiliti pengeksport durian mendapat pensijilan kualiti yang diperlukan bagi memenuhi permintaan negara pengimport.

Buat masa ini, Kementerian tidak bercadang untuk melaksanakan kajian kesan peningkatan kawasan durian kerana peningkatan keluasan bertanam durian tidak begitu ketara sehingga menjejaskan keluasan tanaman lain. Kawasan penanaman durian secara umumnya menunjukkan tren yang agak sekata yang mana pada tahun 2015 keluasan bertanam yang direkodkan adalah sebanyak 70,608 ha, pada tahun 2016 seluas 66,037 ha dan seluas 72,391 ha pada tahun 2017.

Bagi industri hiliran, Kerajaan sentiasa menggalakkan pekebun durian melibatkan diri dalam penghasilan produk hasilan durian. Antara bantuan yang diberikan adalah seperti berikut:

SOALAN NO. 19

- i. Program Geran Pemadanan *Change Upgrade Product* (CUP) dan Geran Pemadanan *High Impact Product* (HIP) yang meliputi skop seperti kajian nutrisi dan jangka hayat produk; reka bentuk pembungkusan dan pelabelan; peningkatan keupayaan pengeluaran; dan penambahbaikan premis ke arah pensijilan;
- ii. Program Pembangunan Modal Insan yang menawarkan kursus seperti penjenamaan dan pemasaran, kewangan, persijilan Halal (dengan kerjasama *Halal Industry Development Corporation*) dan MeSTI (dengan kerjasama Kementerian Kesihatan Malaysia), penetapan harga, pembungkusan dan pelabelan dan *Hands On Produk*; dan
- iii. Program Pembangunan Pusat Pemprosesan yang mana usahawan durian boleh menggunakan pusat-pusat pemprosesan durian yang diakreditasi untuk memproses durian kepada durian sejuk beku dan durian pes untuk dieksport. Pusat-Pusat Pemprosesan Durian FAMA terdapat di Batu Kurau, Beseri, Tangkak, Machang, Jerantut selain pusat-pusat pemprosesan swasta di Selangor, Johor, Melaka dan Pahang.

**PEMBERITAHUAN PERTANYAAN LISAN DEWAN RAKYAT,
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 15 NOVEMBER 2018 (KHAMIS)

SOALAN NO. 20

Minta **MENTERI HAL EHWAL EKONOMI** menyatakan perkembangan terkini mengenai rancangan untuk menghapuskan hutang tidak wajar peneroka FELDA, agar menepati janji manifesto Pakatan Harapan dalam Pilihan Raya Umum Ke-14.

JAWAPAN

Yang di-Pertua,

Untuk makluman Ahli Yang Berhormat, Kerajaan sentiasa komited dalam membela nasib peneroka FELDA dan keluarga mereka. Kerajaan pada hari ini mendapati FELDA sedang menghadapi masalah aliran tunai yang amat kritikal. Selaras iltizam untuk memulihkan FELDA, langkah pertama diambil Kerajaan adalah pelantikan Pengerusi dan Ahli Lembaga FELDA baharu yang telah dilaksanakan pada Julai 2018.

Justeru, tumpuan segera Lembaga Pengarah dan Pengurusan FELDA yang baharu adalah untuk memulihkan kedudukan aliran tunai FELDA melalui perbincangan dengan pemiutang (*creditors*) untuk menstrukturkan semula pinjaman FELDA yang sudah mencecah jumlah keseluruhan RM8.025 bilion.

Langkah seterusnya yang sedang diambil untuk memperkukuhkan kedudukan aliran tunai adalah melalui penjualan aset-aset yang tidak strategik seperti hartanah di luar dan dalam negara. Pulangan daripada penjualan berkenaan akan dipastikan mendapat nilai yang terbaik dan boleh dimanfaatkan bagi tujuan operasi, seterusnya kepada kesejahteraan peneroka.

Kedudukan kewangan FELDA yang kritikal pada hari ini adalah legasi kepimpinan terdahulu yang lemah dalam tadbir urus korporat dan pengurusan kewangan yang tidak bertanggungjawab. Kerajaan baru komited untuk memulihkan FELDA secepat mungkin demi kesejahteraan peneroka-peneroka selaras dengan matlamat penubuhan FELDA di bawah Akta Kemajuan Tanah 1956. Fokus utama Lembaga Pengarah dan juga Pengurusan FELDA yang baharu adalah untuk melaksanakan tanggungjawab perundangan (*statutory obligation*) terhadap peneroka-peneroka FELDA.

Kerajaan yakin Lembaga Pengarah dan Pengurusan FELDA yang baharu akan berpegang kepada prinsip kebertanggungjawaban dan tadbir urus yang tinggi demi menjayakan proses pemulihan FELDA dan pembangunan FELDA yang mampan. Untuk maksud ini Kerajaan telahpun memutuskan untuk membentangkan Kertas Putih (*White Paper*) di dalam Parlimen pada sidang kali ini bagi mendedahkan situasi sebenar yang dihadapi FELDA dan juga perancangan strategik pemulihan agensi tersebut.

Lanjutan dari itu, Kerajaan percaya kedudukan sebenar agensi ini dan langkah pemulihannya akan dapat dikenal pasti. Seterusnya ini akan membantu Kerajaan dalam merangka pelan tindakan pemulihan menyeluruh yang bersesuaian dan memberi manfaat langsung kepada para peneroka.

Sekian, terima kasih.

15 November 2018

Kementerian Hal Ehwal Ekonomi

SOALAN NO : 22

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' DR. HAJI NOOR AZMI BIN GHAZALI

KAWASAN : BAGAN SERAI

TARIKH : 15 NOVEMBER 2018, KHAMIS

SOALAN :

YB DATO' DR. HAJI NOOR AZMI BIN GHAZALI minta **MENTERI KERJA RAYA** menyatakan adakah Kerajaan bersedia untuk menempatkan alat defibrillasi luaran atau AED di lokasi tumpuan awam seperti di kawasan rehat dan rawat di lebuh raya yang dapat membantu menyelamatkan nyawa mangsa serangan jantung mengejut yang mungkin terjadi pada bila-bila masa dan di kalangan sesiapa sahaja.

JAWAPAN :

Tuan Yang Di-Pertua,

Untuk makluman Ahli Yang Berhormat, secara umumnya, lebuhraya-lebuhraya di Malaysia telah direkabentuk dengan menggunakan standard dan piawaian seperti American Association of State Highway and Transportation Official (AASHTO), Road Engineering Association of Malaysia (REAM) serta garis panduan yang digunakan di peringkat antarabangsa. Ini adalah bagi memastikan aspek keselamatan dan keselesaan pengguna sentiasa diutamakan.

Buat masa ini, pihak Kementerian tidak mempunyai perancangan untuk menempatkan alat defibrilasi luaran atau AED di kawasan rehat dan rawat lebuh raya. Walau bagaimanapun, Pihak Kementerian bersama Lembaga Lebuhraya Malaysia (LLM), pihak konsesi dan Kementerian Kesihatan Malaysia akan mengadakan perbincangan bagi meneliti kesesuaian cadangan tersebut pada masa akan datang.

Untuk makluman Ahli Yang Berhormat, pihak Lembaga Lebuhraya Malaysia (LLM) telah menetapkan SOP iaitu pasukan peronda lebuhraya akan tiba di lokasi kecemasan dalam masa 10 minit dan membantu mengalihkan kenderaan yang terlibat serta mengawal lalu lintas. Selain itu, pihak konsesi juga akan menghubungi agensi-agensi yang lain seperti pihak polis, ambulans, bomba dan sebagainya untuk membantu menangani kes-kes kecemasan tersebut dengan segera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN
DARIPADA : YB DATUK DR. HAJI ABD. LATIFF BIN AHMAD
[MERSING, BN – UMNO]
TARIKH : 15 NOVEMBER 2018 (KHAMIS)
SOALAN : 23

YB DATUK DR. HAJI ABD. LATIFF BIN AHMAD [MERSING] Minta **PERDANA MENTERI** menyatakan apakah usaha-usaha yang telah diambil oleh Kerajaan dalam mengukuhkan kerjasama Malaysia di peringkat serantau dan antarabangsa dan apakah perancangan Kerajaan untuk memastikan kerjasama antarabangsa ini memberi manfaat kepada agensi-agensi penguatkuasa Malaysia dalam menangani ancaman keselamatan.

JAWAPAN: YB TUAN MOHAMED HANIPA MAIDIN
Timbalan Menteri Di Jabatan Perdana Menteri

Tuan Yang di-Pertua,

1. Antara usaha-usaha yang telah dilaksanakan oleh Kerajaan dalam mengukuhkan kerjasama di peringkat serantau dan antarabangsa dalam menangani ancaman keselamatan sempadan darat, maritim

dan siber adalah dengan mewujudkan mekanisme seperti memorandum persefahaman, perjanjian, rundingan berkala dan sebagainya dalam pelbagai platform.

2. Bagi kerjasama keselamatan sempadan darat, Kerajaan telah menjalinkan kerjasama di peringkat dua hala dengan Indonesia dan Thailand melalui pewujudan jawatankuasa-jawatankuasa yang bertanggungjawab untuk melaksanakan pelbagai program perundingan secara berkala setiap tahun. Program-program tersebut telah menyumbang kepada keselamatan di kawasan sempadan serta menjana pembangunan ekonomi dan sosial kepada masyarakat setempat.
3. Bagi kerjasama maritim pula, perjanjian-perjanjian yang telah dimeterai sama ada di peringkat dua hala, tiga hala dan pelbagai hala memfokuskan kepada aspek perkongsian maklumat, perisikan, pembangunan kapasiti, latihan, rondaan dan operasi bersama dalam usaha menangani ancaman keselamatan.
4. Akhir sekali, bagi kerjasama dalam bidang siber, Malaysia amat aktif di peringkat ASEAN dalam melaksanakan inisiatif kerjasama dalam kalangan negara anggota di ketiga-tiga platform ASEAN iaitu komuniti politik dan keselamatan, komuniti ekonomi dan komuniti sosio-budaya yang masing-masing mempunyai pelbagai inisiatif keselamatan siber.
5. Antaranya adalah pembangunan ASEAN *Regional Forum* (ARF) *Work Plan on Security of and in The Use of ICTs* dan pembangunan platform khusus bagi membincangkan isu berhubung keselamatan siber dalam ARF iaitu ARF *Inter-Sessional Meeting on Security of and in The Use of ICTs*. Penubuhan platform ini turut membawa kepada inisiatif-inisiatif pembangunan keyakinan khusus dalam bidang keselamatan siber seperti ARF *Cyber Point of Contacts* (PoC), perbincangan berhubung norma-norma siber serta pelaksanaan seminar, bengkel dan latihan dalam bidang keselamatan siber.

6. Dari aspek jenayah siber pula, para penguatkuasa turut melaksanakan kerjasama bersama dalam melaksanakan perkongsian maklumat dalam mempercepatkan proses siasatan seperti Polis Diraja Malaysia yang merupakan *Point of Contact* (PoC) negara bagi G7 Network yang mengendalikan perkara berhubung jenayah rentas sempadan termasuk jenayah siber. Malaysia juga telah menandatangani MoU bersama negara Amerika Syarikat, Australia, United Kingdom dan Vietnam serta Perjanjian bersama negara Arab Saudi dan China berhubung kerjasama dalam menangani jenayah rentas sempadan termasuk jenayah siber.

Tuan Yang di-Pertua,

7. Kerjasama yang telah dilaksanakan di peringkat serantau dan antarabangsa ini sememangnya telah memberi manfaat kepada negara terutamanya dari segi berkongsi amalan terbaik (*best practices*), membina jalinan perhubungan atau *networking* dengan *counterpart* dari negara luar dan saling bantu-membantu antara agensi-agensi penguatkuasa dalam dan luar negara bagi mengenalpasti kaedah serta cara terbaik untuk menangani isu-isu keselamatan.
8. Oleh yang demikian, Kerajaan akan meneruskan dan meningkatkan kerjasama dalam aspek keselamatan sempadan darat, maritim dan siber menerusi platform-platform sedia ada serta akan mengenalpasti mekanisme-mekanisme kerjasama baru yang bermanfaat bagi Malaysia demi memastikan keselamatan negara terpelihara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : DATUK HALIMAH BINTI MOHAMED SADIQUE
[KOTA TINGGI]

TARIKH : 15 NOVEMBER 2018 (KHAMIS)

SOALAN NO. 24

Datuk Halimah binti Mohamed Sadique minta **MENTERI BELIA DAN SUKAN** menyatakan kajian terperinci yang telah dijalankan dalam usaha menurunkan had umur wajib mengundi ke 18 tahun.

JAWAPAN

Tuan Yang di-Pertua,

1. Seperti mana Ahli Yang Berhormat sedia maklum, berdasarkan keputusan Mesyuarat Jemaah Menteri, Kerajaan secara prinsipnya telah meluluskan cadangan untuk menurunkan umur layak mendaftar sebagai pemilih dari umur 21 tahun kepada 18 tahun. Selaras dengan keputusan tersebut, Suruhanjaya Pilihan Raya (SPR) sedang mengadakan kerjasama dengan Kementerian Belia dan Sukan, Jabatan Peguam Negara dan Jawatankuasa Pembaikan Sistem dan Undang-Undang Pilihan Raya Malaysia (*Electoral Reform Committee* - ERC) untuk meneliti pindaan undang-undang yang terlibat termasuk pindaan kepada undang-undang sedia ada.

SOALAN NO : 24

2. Pihak Kementerian Belia dan Sukan telah melaksanakan beberapa penelitian dan rujukan silang bagi mendapatkan justifikasi terperinci berkaitan cadangan penurunan had umur mengundi seperti membuat semakan ke atas pelaksanaan umur mengundi di negara-negara luar seperti Negara Eropah, Amerika Selatan dan negara-negara Arab terutama negara ASEAN.
3. Selain itu, semakan juga turut dilaksanakan dengan membuat perbandingan beberapa akta-akta di Malaysia, enakmen dan peraturan yang memberi impak signifikan ke atas pindaan had umur mengundi seperti Akta Umur Dewasa 1971, Akta Membaharui Undang-Undang (Perkahwinan dan Perceraian) 1976 (Akta 164), Akta Kanak-kanak dan Orang Muda (Pekerjaan) 1966 (Akta 350), Enakmen Keluarga Islam, kelayakan memperoleh lesen memandu, kelayakan menyertai Angkatan Tentera Malaysia dan Polis Diraja Malaysia.
4. Sehubungan itu, KBS di dalam perancangan untuk melaksanakan kajian terperinci setelah beberapa penyelarasan di buat bersama Agensi dan Kementerian berkaitan ke atas gerak kerja pindaan ini kelak.

Sekian, terima kasih.

PEMBERITAHUAN PERTANYAAN BAGI JAWAPAN BAGI SOALAN
LISAN MESYUARAT KEDUA, PENGGAL PERTAMA,
PARLIMEN KEEMPAT BELAS
MAJLIS MESYUARAT DEWAN RAKYAT

PERTANYAAN : LISAN

DARIPADA : Dato' Seri Mahdzir Bin Khalid [Padang terap]

TARIKH : 15 NOVEMBER 2018

SOALAN :

minta **MENTERI INDUSTRI UTAMA** menyatakan apakah mekanisme Kementerian di dalam meningkatkan harga getah di pasaran yang kian merosot sehingga menjejaskan pendapatan penoreh getah serta adakah Kementerian bercadang untuk menetapkan harga lantai getah agar dapat membantu dan sumber pendapatan pekebun kecil getah tidak terjejas.

JAWAPAN:

Tuan Yang Di-Pertua,

Masalah harga getah yang merosot bukan sahaja berlaku di Malaysia tetapi melibatkan semua negara pengeluar. Ini disebabkan getah asli adalah berorientasikan eksport dan harganya ditentukan oleh permintaan dan penawaran antarabangsa. Malaysia juga hanya mengeluarkan 5.5% daripada jumlah pengeluaran getah dunia dan kita tidak mampu untuk menentukan harga getah di pasaran dunia.

Dalam hal ini, Kementerian sentiasa berusaha memperkukuh pembangunan industri getah dengan melaksanakan mekanisme berikut:

- (i) melaksanakan mekanisme penetapan harga di ladang dengan menyediakan peruntukan sebanyak RM6.4 juta sebagai modal pusingan kepada koperasi-koperasi untuk tujuan urus niaga getah. Langkah ini dapat meningkatkan harga pembelian getah di peringkat ladang dengan mengurangkan lapisan pembeli. Pengurangan orang tengah membantu pekebun-pekebun kecil getah mendapat harga yang munasabah dan *remunerative*;
- (ii) memperuntukkan RM12 juta bagi melaksanakan program untuk menggalakkan pengeluaran lateks tempatan. Peruntukan ini akan digunakan untuk memperkuat infrastruktur kutipan lateks. Penglibatan pekebun kecil dalam pengeluaran lateks akan dapat meningkatkan pendapatan mereka memandangkan harga lateks adalah lebih tinggi berbanding *cuplump*. Di samping itu, program ini juga dijangka dapat menampung permintaan lateks dalam negara dan mengurangkan pengimportan lateks bagi industri sarung tangan;
- (iii) meningkatkan penggunaan getah dalam negara sebanyak 10% setahun, contohnya melalui penggunaan adunan getah dengan bitumen dalam pembinaan jalan raya dan lain-lain penghasilan barangan getah oleh pihak industri hiliran;
- (iv) mempergiat aktiviti R&D bagi meningkatkan penghasilan produk baharu berasaskan getah termasuk penghasilan Ekoprena dan Pureprena, '*seismic bearing*' dan lain-lain produk bernilai tambah tinggi; dan
- (v) menjalinkan kerjasama dengan lain-lain negara pengeluar utama getah seperti Thailand dan Indonesia di bawah kerangka *International Tripartite Rubber Council* (ITRC) bagi memperkuat harga getah dalam usaha meningkatkan harga komoditi getah ini.

Tuan Yang Di-Pertua,

Pada masa ini, Kerajaan tidak bercadang untuk menetapkan harga lantai getah sekerap. Ini kerana pelaksanaan harga lantai akan memberikan impak kewangan yang besar kepada Kerajaan. Kerajaan tidak dapat mempertimbangkan cadangan mewujudkan harga lantai berdasarkan kepada faktor-faktor berikut:

- i. Penetapan harga lantai memerlukan sumber kewangan yang tinggi bagi menyokongnya sekiranya harga getah asli dunia mengalami tren penurunan yang mendadak;
- ii. Menyediakan ruang kepada aktiviti spekulasi harga dalam kalangan para penjual getah dengan menekan harga ke paras rendah dan mengharapkan Kerajaan akan menampung perbezaan di antara harga pasaran dan harga lantai; dan
- iii. Menyediakan ruang kepada aktiviti penyeludupan getah dari luar negara memandangkan harga tempatan adalah lebih tinggi berbanding dengan harga antarabangsa.

Walau bagaimanapun, Kerajaan telah melaksanakan pemberian Insentif Pengeluaran Getah (IPG) bermula tahun 2015 untuk meringankan beban pendapatan pekebun kecil di samping memberi galakan kepada pekebun kecil untuk terus menoreh sewaktu harga getah rendah di pasaran. Insentif ini hampir sama dengan konsep harga lantai kerana IPG akan diaktifkan apabila purata harga bulanan SMR 20 pada bulan sebelumnya kurang dari RM5.50 sekilogram atau harga di ladang untuk getah sekerap adalah di bawah RM2.20 sekilogram. Perbezaan harga akan ditampung oleh Kerajaan bagi pengeluaran yang dihasilkan oleh pekebun kecil.

Sekian terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN WONG KAH WOH (IPOH TIMOR)

TARIKH : 15 NOVEMBER 2018

SOALAN : 26

Tuan Wong Kah Woh [Ipoh Timur] minta MENTERI DALAM NEGERI menyatakan pendirian dan langkah-langkah Kementerian untuk mewujudkan keadaan yang lebih baik kepada banduan-banduan serta tahanan polis selari dengan *United Nations Standard Minimum Rules for Treatment of Prisoners*.

JAWAPAN:

Tuan Yang Di Pertua,

Kementerian Dalam Negeri melalui Jabatan Penjara Malaysia sentiasa menitikberatkan aspek keselamatan dan layanan terhadap banduan. Dalam hal ini, Jabatan Penjara Malaysia melaksanakan pengurusan penahanan, keselamatan, layanan, pemulihan dan pengintegrasian penghuni berdasarkan perundangan sedia ada dan juga mematuhi penetapan standard antarabangsa seperti *United Nations Standard Minimum Rules for Treatment of Prisoners* (UNSMR).

Bagi memenuhi tuntutan hak asasi penghuni, Kementerian Dalam Negeri melalui Jabatan Penjara Malaysia bertanggungjawab memastikan layanan adalah secara profesional, adil dan saksama berlandaskan perundangan serta nilai-nilai kemanusiaan. Begitu juga tiada amalan diskriminasi terhadap penghuni disebabkan oleh perbezaan bangsa, warna kulit, jantina, bahasa dan agama. Pada masa yang sama, Jabatan Penjara Malaysia sentiasa memantau dan memastikan ketetapan perundangan berhubung hak asasi serta layanan terhadap penghuni dipatuhi.

Jabatan Penjara Malaysia telah mengambil beberapa inisiatif dalam memastikan kebajikan banduan terpelihara. Di mana, adalah menjadi tanggungjawab Jabatan Penjara Malaysia bagi menyelesaikan isu yang dihadapi oleh banduan seperti masalah kekeluargaan, hubungan dengan majikan dan isu peribadi sebaik mungkin, dengan harapan ia akan memberi kesan positif serta dapat mengurangkan tekanan di kalangan banduan.

Untuk makluman Ahli Yang Berhormat, *The United Nations Working Group On Arbitrary Detention* (WGAD) semasa melawat dan memeriksa beberapa buah institusi penjara pada tahun 2010, telah tidak menimbulkan sebarang keraguan terhadap layanan yang dilaksanakan untuk banduan. Begitu juga dengan lawatan yang dilaksanakan oleh *International Committee of the Red*

Cross (ICRC) ke institusi penjara, di mana pihak ICRC telah mengambil maklum bahawa wujud perkembangan yang baik melalui penambahbaikan berterusan oleh Jabatan Penjara Malaysia dalam aspek layanan terhadap banduan.

Selain itu, program pemulihan yang dijalankan oleh Jabatan Penjara Malaysia seperti program pemulihan di luar tembok penjara bukan sahaja dipilih untuk dijadikan kursus bagi pegawai penjara di rantau Asia Pasifik di bawah *Malaysian Technical Cooperation Program* (MTCP), malah ia juga telah dijadikan satu bentuk kajian dan terdapat juga negara yang telah melaksanakan model pemulihan ini di negara mereka.

Polis DiRaja Malaysia (PDRM) juga memandang serius terhadap aspek keselamatan dan layanan terhadap orang tahanan, terutamanya kematian yang melibatkan orang tahanan dalam tahanan pihak polis. Di mana, pihak polis akan menjalankan siasatan dengan lebih terperinci sama ada kematian tersebut disebabkan oleh kecuaiian atau kematian disebabkan oleh penyakit.

Pihak SUHAKAM juga telah membuat satu kaji selidik mengenai keadaan lokap dan faktor-faktor penyumbang kepada kematian pada tahun 2016.

Sehubungan itu, pihak pengurusan PDRM telah menyemak semula *Standard Operation Procedure* (SOP) yang sedia ada bagi pengurusan orang tahanan dengan memasukkan elemen baru di antaranya:

- a) memastikan borang pengesahan penyakit / kecederaan hendaklah diisi dan disahkan oleh orang tahanan itu sendiri;
- b) orang tahanan yang mengidap penyakit berjangkit yang berisiko tinggi kepada tahanan lain hendaklah dengan seberapa yang boleh diasingkan daripada tahanan lain;

- c) lawatan pihak SUHAKAM, di mana lawatan ini adalah untuk menentukan tahanan yang ditahan mengikut garis panduan yang dikeluarkan oleh pihak antarabangsa;
- d) orang tahanan hendaklah seboleh mungkin diasingkan mengikut kategori penahanan mereka sama ada ianya merupakan tahanan reman, tahanan yang telah dijatuhkan hukuman, tahanan yang mabuk, penjenayah yang "habitual", tahanan yang ditahan di bawah undang-undang pencegahan, tahanan wanita serta tahanan kanak-kanak; dan
- e) pemeriksaan berkala oleh pegawai perubatan dari Kementerian Kesihatan Malaysia.

Di samping itu, PDRM juga dari semasa ke semasa melaksanakan penambahbaikan terhadap sistem dan peraturan selaras dengan transformasi negara agar layanan dan keselamatan terhadap tahanan dilaksanakan dengan lebih telus dan diterima oleh semua pihak.

Sepertimana usaha pihak PDRM, Jabatan Penjara Malaysia juga sentiasa melaksanakan penambahbaikan dari semasa ke semasa terutamanya dalam aspek pengurusan kepenjaraan seperti layanan, kemudahan asas, kesihatan, latihan dan pemulihan dengan kerjasama dari pelbagai Agensi Kerajaan dan Badan bukan Kerajaan, bagi memastikan kebajikan dan kesihatan banduan terjaga.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK SERI HAJI AHMAD BIN HAMZAH
[JASIN]
TARIKH : 15 NOVEMBER 2018 (KHAMIS)

SOALAN NO. 27

Y.B. DATUK SERI HAJI AHMAD BIN HAMZAH [JASIN] minta **MENTERI KEWANGAN** menyatakan dengan jujur, tepat dan faktual mengenai formula Kerajaan untuk menambah hasil Kerajaan tanpa membebankan rakyat serta menangani beban hutang Kerajaan tanpa mengurangkan perbelanjaan mengurus dan pembangunan demi kesejahteraan rakyat.

JAWAPAN

Tuan Yang di-Pertua,

1. Apabila Pakatan Harapan mengambil alih pentadbiran Kerajaan, di antara perkara pertama yang dilakukan adalah menilai semula kedudukan kewangan sebenar Kerajaan Persekutuan. Setelah penilaian semula dilakukan keseluruhan komitmen Kerajaan dalam bentuk hutang dan liabiliti pada akhir 2017 adalah sebanyak RM1.083 trilion. Jumlah komitmen yang besar ini boleh menjejaskan sistem penyampaian perkhidmatan Kerajaan, kesejahteraan rakyat dan agenda pembangunan negara memandangkan Kerajaan terpaksa menyediakan peruntukan yang besar bagi memenuhi jumlah komitmen berkaitan dan pada masa yang sama mengurangkan peruntukan bagi perbelanjaan yang produktif.

2. Oleh itu, dalam jangka pendek, keutamaan Kerajaan adalah untuk mengukuhkan kedudukan kewangannya dengan matlamat mengurangkan jumlah hutang dan liabiliti. Sehubungan itu, Kerajaan juga telah menyediakan peruntukan untuk membayar tunggakan tuntutan bayaran balik cukai berjumlah RM37 billion. Penyelesaian tunggakan ini adalah penting bagi memulihkan kewangan Kerajaan selain memenuhi tanggungjawab moral untuk memulangkan kesemua tunggakan bayaran balik cukai kepada individu, syarikat dan rakyat Malaysia pada tahun 2019.

3. Bagi meningkatkan kutipan hasil, seperti yang telah diumumkan dalam Belanjawan 2019, Kerajaan telah menubuhkan Jawatankuasa Pembaharuan Cukai bagi menjalankan kajian menyeluruh mengenai sistem percukaian negara termasuk mengenal pasti sumber pendapatan baru. Kerajaan turut akan melaksanakan inisiatif dengan memanfaatkan aset dan semakan semula dasar percukaian. Melalui inisiatif semakan semula dasar percukaian, antara langkah yang akan dilaksanakan bagi meningkatkan hasil Kerajaan adalah seperti berikut:

1. Mengenakan Cukai Perkhidmatan ke atas perkhidmatan yang diimport

termasuk perkhidmatan atas talian;

2. Melancarkan Program Khas Pengakuan Sukarela (*Special Voluntary Disclosure Program*) bagi meningkatkan pengisytiharan pendapatan oleh pembayar cukai secara sukarela;
3. Melaksanakan Pertukaran Maklumat Secara Automatik (AEOI) dengan pihak berkuasa percukaian lain di bawah inisiatif *Organisation for Economic and Co-Operation and Development* (OECD) untuk meningkatkan ketelusan percukaian;
4. Mengkaji semula layanan cukai dan insentif sedia ada di bawah pelbagai perundangan bagi memastikan ianya relevan dan dapat mengurangkan ketirisan hasil;
5. Meningkatkan usaha membanteras aktiviti penyeludupan dan penipuan khususnya penyeludupan rokok oleh Jabatan Kastam Diraja Malaysia;
6. Mengenakan levi pelepasan (*departure levy*) bagi semua penumpang ke luar negara melalui laluan udara;
7. Memperkemas Cukai Keuntungan Harta Tanah (*Real Property Gains Tax*) ke atas keuntungan daripada pelupusan harta tanah dan saham dalam syarikat hartanah dalam tahun ke-6 dan tahun seterusnya;
8. Menaikkan kadar duti setem bagi pemindahan hartanah bernilai lebih RM1 juta daripada 3% kepada 4%;
9. Menamatkan pengecualian cukai pendapatan faedah yang diperolehi daripada dana pasaran wang pemborong (*wholesale money market funds*) kerana dana ini telah mencatatkan pertumbuhan yang kukuh pada kadar 24% setiap tahun sejak 2010; dan
10. Menaikkan kadar cukai, fi dan levi ke atas sektor perjudian yang tidak dinaikkan sejak tahun 2005.

Selain itu, melalui inisiatif memanfaatkan aset, Kerajaan akan melaksanakan langkah seperti berikut:

1. Mengurangkan pegangan dalam syarikat bukan strategik;
2. Melaksanakan model kerjasama awam swasta (PPP) yang sebenar bagi projek berdasarkan transaksi tukaran tanah secara tender terbuka dan

- bukannya menjalankan kaedah rundingan terus;
3. Melaksanakan penjualan tanah secara berjadual dan berperingkat kepada pembida tertinggi tertakluk kepada syarat tanah; dan
 4. Menswastakan aset infrastruktur Kerajaan melalui pewujudan Amanah Pelaburan Hartanah (REIT) bagi Lapangan Terbang.

Tuan Yang di-Pertua,

4. Kerajaan turut akan meningkatkan kecekapan perbelanjaan melalui langkah rasionalisasi perbelanjaan dengan mengenal pasti program dan projek yang mempunyai keutamaan untuk dilaksanakan. Pada masa yang sama, langkah mengurangkan ketirisan dan pembaziran akan dilaksanakan dengan menambahbaik kaedah perolehan Kerajaan serta klausa dan terma pengurusan kontrak untuk memastikan perbelanjaan Kerajaan adalah lebih berhemat dan cekap dari segi kos. Selain itu, Kerajaan juga telah menstruktur semula pendekatan belanjawan melalui *zero based budgeting* serta menyemak semula semula pelaksanaan projek mega seperti *Trans-Sabah Gas Pipeline (TSFGP)*, *Multi-Product Pipeline (MPP)*, *East Coast Rail Link (ECRL)* dan *High Speed Rail (HSR)*. Kerajaan juga telah merunding semula kos bagi projek LRT3, MRT2 dan mendapat penjimatan serta menghentikan amalan pelaksanaan PPP secara *deferred payment*. Di samping itu, Kerajaan akan melaksanakan mekanisme subsidi secara bersasar khususnya bagi subsidi bahan api dan elektrik.

5. Berdasarkan langkah-langkah ini, Kerajaan yakin paras hutang dan liabiliti dapat dikurangkan pada masa yang sama terus melaksanakan program dan projek terutamanya yang berupaya meningkatkan kesejahteraan rakyat serta mempunyai kesan pengganda ekonomi yang tinggi seterusnya mengukuhkan kedudukan kewangan Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : YB TUAN TAN KOK WAI
[CHERAS]
TARIKH : 15 NOVEMBER 2018 (KHAMIS)

SOALAN NO. 28

Minta **MENTERI KESIHATAN** menyatakan dalam masa kewangan negara terhad sekarang, apakah strategi dan langkah yang diambil untuk menyediakan perkhidmatan penjagaan kesihatan yang amat berkesan dan bermutu tinggi untuk rakyat pada kos operasi yang rendah.

JAWAPAN

Yang di-Pertua,

Dalam masa kewangan yang terhad, perkhidmatan kesihatan sedang dipertingkatkan dengan mewujudkan sistem kesihatan yang mampan, mengoptimum sumber kewangan, memperkukuh kesihatan penduduk dan mempererat kerjasama dalam kalangan berkepentingan (Rujukan: KSP RMK-11).

Antara langkah-langkah yang diambil oleh Kementerian untuk merealisasikan reformasi perkhidmatan penjagaan kesihatan melalui strategi tersebut adalah:

- i. Meningkatkan kemudahan perkhidmatan kepakaran seperti penjagaan geriatrik, penjagaan paliatif dan pemulihan;
- ii. Menambah baik akses kepada penjagaan kesihatan berkualiti dan meningkatkan nisbah katil hospital kepada penduduk;
- iii. Membina pusat kanser baharu di wilayah utara;
- iv. Menggubal dasar dan peraturan baharu bagi mengawal selia produk dan perkhidmatan penjagaan kesihatan dalam talian untuk melindungi pengguna serta memastikan keselamatan, kualiti dan pematuhan kepada standard dalam kalangan penggiat industri; dan
- v. Mengukuhkan Perkhidmatan Penjagaan Kesihatan Domisiliari.

Kementerian yakin bahawa penggunaan teknologi merupakan anjakan paradigma dalam sektor perkhidmatan penjagaan kesihatan dalam era industri revolusi 4.0 seperti perkhidmatan penjagaan digital.

Kini Kementerian sedang menjalankan kajian untuk memindahkan data maklumat kesihatan secara digital. Dengan mendigitalkan kemudahan

kesihatan, Kementerian akan meningkatkan kecekapan penyampaian kesihatan seperti memendekkan masa menunggu pesakit dan memudahkan akses rekod pesakit di seluruh fasiliti KKM.

Pendigitalan beban penyakit yang perlu ditanggung di setiap peringkat daerah, negeri dan persekutuan akan menjurus ke arah penyimpanan data kesihatan yang holistik bagi seluruh Malaysia. Oleh itu, fokus Kementerian ketika ini adalah untuk mendigitalkan sistem rekod kesihatan secara *electronic medical record* (EMR).

Yang di-Pertua,

Belanjawan 2019 yang telah dibentangkan oleh YB Menteri Kewangan pada 2 November 2018 membuktikan Kerajaan amat prihatin dalam memastikan perkhidmatan kesihatan yang berkualiti dan mudah diperolehi oleh rakyat. Bagi perkhidmatan kesihatan, hampir RM29 billion (RM28.68 bilion) telah diperuntukkan dengan peningkatan sebanyak 7.8% berbanding tahun 2018. Ini adalah termasuk RM10.8 billion bagi membaik pulih klinik dan hospital di samping pembelian ubat-ubatan dan kelengkapan.

Antara strategi untuk mengoptimumkan perbelanjaan, KKM sentiasa membuka ruang dan peluang untuk **jalinan kerjasama dengan pihak berkepentingan** yang dapat berkongsi kos perkhidmatan penjagaan kesihatan untuk rakyat. Di antara usaha-usaha yang dijalankan ialah seperti berikut:

- i. Kerjasama antara agensi akan diperkukuh dan dipertingkatkan melalui penyelarasan yang lebih teratur dengan menggembelng agensi Kerajaan dan *Corporate Social Opportunity* (CSO) yang berkaitan. Kerjasama ini akan memberi tumpuan kepada penambahbaikan masa respons kecemasan, pencegahan wabak, kesiapsiagaan terhadap bencana termasuk respons dan mitigasi serta rehabilitasi awal;

NO SOALAN: 28

- ii. Perkhidmatan yang disediakan oleh Kerajaan seperti Perkhidmatan Penjagaan Kesihatan Domisiliari dan Program Khidmat Bantu di Rumah akan terus diperkukuh melalui penyertaan yang lebih meluas daripada sektor Badan Bukan Kerajaan (NGO) dan sukarelawan; dan
- iii. Kerjasama antara KKM dengan Majlis Agama Islam Negeri seperti penyediaan Pusat Pembedahan Katarak Majlis Agama Islam Wilayah Persekutuan (MAIWP)-Hospital Selayang dan Pusat Bersalin Berisiko Rendah MAIWP-Hospital Putrajaya akan diperluas ke seluruh Malaysia.

Bagi mengurangkan kos operasi, KKM juga telah mengambil langkah proaktif dengan mendapatkan kelulusan khas daripada Kementerian Kewangan untuk melaksanakan rundingan harga bagi tender terbuka untuk petender tunggal dan petender yang menawarkan harga tawaran melebihi anggaran jabatan. Sehingga 30 September 2018, KKM telah berjaya mendapat penjimatan berjumlah RM92.9 juta melalui proses rundingan ini.

Sehubungan itu, KKM sentiasa komited dalam memberikan perkhidmatan kesihatan yang berkualiti dan mampu diperolehi. Inisiatif-inisiatif yang dirancang dan dilaksanakan oleh KKM mengambil kira kedudukan kewangan semasa Negara dan sentiasa mencari alternatif lain supaya liputan perkhidmatan kesihatan yang disediakan bersifat menyeluruh.

NO. SOALAN: 29

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : YB TUAN HAJI AWANG BIN HASHIM
[PENDANG]**

TARIKH : 15 NOVEMBER 2018 (KHAMIS)

SOALAN : 29

Tuan Haji Awang bin Hashim [Pendang] minta **PERDANA MENTERI** menyatakan apakah hasil siasatan oleh SPRM terhadap bekas Ketua Menteri Pulau Pinang iaitu YB Lim Guan Eng, dan apakah alasan yang membolehkan tuduhan ke atas beliau ditarik balik daripada kes pendakwaan.

JAWAPAN: YB TUAN MOHAMED HANIPA MAIDIN

Timbalan Menteri Di Jabatan Perdana Menteri

Yang Berhormat,

Mahkamah telah memutuskan untuk menarik kes YB Lim Guan Eng, bekas Ketua Menteri Pulau Pinang. Keputusan samada untuk merayu adalah terpulang kepada Peguam Negara.

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)**

PERTANYAAN : LISAN
TARIKH : 15 NOVEMBER 2018
DARIPADA : TUAN LIM KIT SIANG
[ISKANDAR PUTERI]
SOALAN : 30

YB TUAN LIM KIT SIANG [ISKANDAR PUTERI] minta **PERDANA MENTERI** menyatakan apakah perkembangan langkah reformasi institusi-institusi dan agensi-agensi Kerajaan selain daripada GLIC dan GLC.

JAWAPAN: YB TUAN MOHAMED HANIPA MAIDIN
Timbalan Menteri Di Jabatan Perdana Menteri

Tuan Yang di-Pertua,

1. Ahli-Ahli Yang Berhormat, seperti mana Ahli Yang Berhormat sedia maklum, Jawatankuasa Reformasi Institusi (IRC) telah ditubuhkan oleh Majlis Penasihat Kerajaan (CEP) pada 15 Mei 2018 selepas kemenangan Pakatan Harapan dalam Pilihanraya Umum ke-14 yang lalu. IRC telah dipertanggungjawabkan mengkaji langkah-langkah dan cadangan penambahbaikan reformasi terhadap institusi-institusi penting negara ini.

2. Jawatankuasa ini dianggotai oleh lima orang ahli iaitu bekas Hakim Mahkamah Rayuan Dato' KC Vohrah; bekas hakim Mahkamah Rayuan dan Pesuruhjaya Suruhanjaya Hak Asasi Manusia (SUHAKAM) Dato' Mah Weng Kwai; Presiden Persatuan Patriot Kebangsaan (Patriot) Brig. Jen. Dato' Mohamed Arshad Raji (B); Presiden Persatuan Hak Asasi Manusia Kebangsaan (Hakam) Dato' S. Ambiga dan pakar perlembagaan dan pensyarah undang-undang Emeritus Profesor Datuk Dr. Shad Saleem Faruqi.

3. Untuk makluman Ahli-ahli Yang Berhormat, pihak Kerajaan telah pun menerima laporan oleh IRC ini dan Pusat Governans, Integriti dan Anti-Rasuah Nasional atau lebih dikenali (GIACC) telah dipertanggungjawabkan untuk meneliti dan menyelaras pelaksanaan cadangan-cadangan yang dikemukakan di dalam laporan tersebut. Sebanyak 256 cadangan telah dikemukakan yang berkaitan 9 institusi penting iaitu Parlimen, Suruhanjaya Pilihanraya, Badan Kehakiman, Jabatan Peguam Negara, Suruhanjaya Pencegahan Rasuah Malaysia, Polis DiRaja Malaysia, Jabatan Imigresen Malaysia, Suruhanjaya Komunikasi dan Multimedia Malaysia dan Suruhanjaya Hak Asasi Manusia Malaysia (SUHAKAM).

4. Daripada jumlah cadangan tersebut, sebanyak 223 cadangan adalah berkaitan dengan skop kerja governans, integriti dan pencegahan rasuah. Manakala, baki 33 cadangan adalah berkaitan dengan aspek komunikasi, media dan informasi. Untuk makluman dan perhatian Ahli Yang Berhormat, kesemua cadangan ini terlebih dahulu akan diteliti oleh Kementerian/ Agensi berkaitan sebelum dibawa ke mesyuarat Jawatankuasa Khas Kabinet Mengenai Anti Rasuah

(JKKMAR) yang dipengerusikan oleh YAB Perdana Menteri untuk membuat keputusan pelaksanaannya.

5. Sehingga kini, terdapat 49 keputusan dan inisiatif telah diputuskan oleh JKKMAR untuk dilaksanakan. Antaranya adalah pemerkasaan institusi-institusi seperti Mahkamah, Parlimen, SPRM dan Jabatan Audit Negara agar peranannya lebih berkecuali dan dapat bertindak dengan lebih bebas. Inisiatif-inisiatif lain yang dipersetujui adalah penubuhan Suruhanjaya Bebas Aduan dan Salah Laku Polis (IPCMC), peranan Biro Pengaduan Awam sebagai 'ombudsman', mekanisme perisytiharan harta dan mekanisme pelaporan penerimaan hadiah.

6. Ahli Yang Berhormat, cadangan Ahli Yang Berhormat untuk laporan tersebut didedahkan kepada umum akan hanya diputuskan setelah laporan-laporan tersebut diteliti dan diumumkan pelaksanaannya oleh Kerajaan dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATIN MASTURA BINTI MOHD YAZID
[KUALA KANGSAR]**

TARIKH : 15 NOVEMBER 2018 (KHAMIS)

SOALAN NO.31

Minta **MENTERI PENDIDIKAN** menyatakan adakah Kementerian akan membuat kajian kepada semua modul-modul Kolej Komuniti supaya ia lebih sesuai dengan permintaan industri di kawasan lokaliti Parlimen Kolej Komuniti berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) dalam perancangan untuk membuat kajian semula modul sedia ada yang ditawarkan di kolej komuniti supaya lebih sesuai dengan permintaan industri di kawasan lokaliti Parlimen kolej komuniti. Kajian semula berkenaan akan mengambil kira keperluan *Malaysian Qualifications Agency* (MQA) yang bersesuaian dengan permintaan industri, kehendak komuniti setempat dan keperluan pembelajaran abad ke-21.

Selain daripada modul-modul berasaskan pendidikan kemahiran TVET, Pendidikan di Kolej Komuniti juga menekankan kepada kemahiran insaniah, keupayaan pelajar menyelesaikan masalah kompleks, kemahiran berfikir secara kritis, semangat kerja berpasukan dan berkemahiran dalam membuat keputusan serta berunding selaras dengan keperluan falsafah pendidikan negara.

Sekian, terima kasih.

RJM100

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN FONG KUI LUN
[BUKIT BINTANG]**

TARIKH : 15 NOVEMBER 2018 (KHAMIS)

SOALAN NO.32

Minta **MENTERI HAL EHWAL EKONOMI** menyatakan apakah pelan tindakan ekonomi negara yang baru bagi memacu pertumbuhan ekonomi dalam tahun-tahun akan datang.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah membentangkan dasar dan hala tuju yang baharu bagi memacu pertumbuhan ekonomi Malaysia untuk tempoh beberapa tahun akan datang dalam Kajian Separuh Penggal Rancangan Malaysia Kebelas (KSP), pada 18 Oktober 2018 yang lalu. Dasar sosioekonomi yang diperkenalkan dalam KSP ini akan melengkapi inisiatif Kerajaan dalam mengukuhkan lagi asas ekonomi dan meningkatkan daya saing negara bagi memastikan pertumbuhan ekonomi yang mampan ke arah negara maju dan inklusif.

Bagi tujuan ini, lima strategi ekonomi makro telah digariskan, seperti berikut:

- a. Pertama, memacu produktiviti pada peringkat nasional, sektor dan perusahaan bagi memastikan pertumbuhan yang mampan dan inklusif;
- b. Kedua, menggalakkan pelaburan berkualiti bagi menerajui pertumbuhan ekonomi;
- c. Ketiga, melaksana inisiatif untuk beralih kepada rantai nilai yang lebih tinggi;
- d. Keempat, mengukuhkan eksport dan mengurus import untuk menambah baik imbalan pembayaran; dan
- e. Terakhirnya, memberi penekanan kepada langkah pengukuhan fiskal untuk memastikan kemampanan dalam jangka sederhana.

Tuan Yang di-Pertua,

Keutamaan dasar dalam menghadapi tahun-tahun yang akan datang adalah bagi mengimbangkan objektif pengukuhan fiskal dan memastikan pertumbuhan ekonomi yang lebih inklusif. Reformasi fiskal dan tadbir urus yang serta merta adalah penting untuk mengukuhkan lagi kedudukan fiskal Kerajaan dan mengagihkan sumber yang mencukupi bagi meringankan beban hidup rakyat. Langkah dasar struktur serta program dan projek pembangunan berimpak tinggi akan

terus dilaksana dengan cara yang lebih telus dan mampan dari segi kewangan bagi memastikan pertumbuhan ekonomi yang lebih bermakna untuk rakyat. Inisiatif juga akan dirangka bagi menangani cabaran baharu dan memanfaatkan sumber pertumbuhan baharu termasuk Revolusi Perindustrian Keempat. Usaha bersepadu ini akan meningkatkan produktiviti dan memastikan Malaysia kekal di landasan pertumbuhan ekonomi ke arah mencapai sasaran sebagai sebuah negara maju dan inklusif.

Sekian, terima kasih.
15 November 2018

Kementerian Hal Ehwal Ekonomi

PARLIMEN MALAYSIA

PEMBERITAHU PERTANYAAN DEWAN NEGARA

PERTANYAAN : Lisan

DARIPADA : Dr. Kelvin Yii Lee Wuen

TARIKH : 15 November (Khamis)

SOALAN NO. 33

Minta MENTERI PERTANIAN DAN INDUSTRI ASAS TANI menyatakan sebab kelewatan pelepasan kapal perikanan (SF1-2929) yang telah ditahan oleh Kerajaan Indonesia pada 20.9.2016 apabila memancing di kawasan Tanjung Datu, Sematan walaupun persetujuan telah dicapai di “Rundingan Tahunan Ke-12 antara bekas PM Malaysia dan TYT Presiden Indonesia” pada 22 November 2017.

JAWAPAN

Tuan Yang Dipertua,

Untuk makluman pihak Tuan Yang Dipertua, semasa Rundingan Tahunan Ke-12 antara YAB Perdana Menteri dan Presiden Republik Indonesia pada 22 November 2017 di Kuching, Sarawak, **kedua-dua pemimpin telah mencapai persetujuan untuk membebaskan nelayan Malaysia dan Indonesia yang ditahan** kerana mencerooboh perairan kedua-dua negara. Persetujuan yang telah dicapai kedua-dua negara tersebut tidak merangkumi pembebasan bot-bot nelayan yang ditahan.

Juragan dan lima orang kru bot nelayan SF1-2929 yang kesemuanya warganegara Indonesia telah ditahan dan dihukum oleh mahkamah Indonesia. Isu pembebasan bot nelayan tempatan yang ditahan di Indonesia masih dalam proses perbincangan di antara pihak berkuasa kedua-dua negara. Berdasarkan undang-undang sedia ada di Indonesia, mana-mana bot nelayan asing yang didapati bersalah kerana mencerooboh perairan akan dilucuthak dan dimusnahkan. Walau bagaimanapun, kerajaan telah menghantar senarai bot-bot nelayan Malaysia yang ditahan kepada pihak berkuasa Indonesia unuk pertimbangan bagi dibebaskan namun sehingga kini masih belum mendapat sebarang maklumbalas.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 15 NOVEMBER 2018 [KHAMIS]

SOALAN NO. 34

Minta **MENTERI PERUMAHAN DAN KERAJAAN TEMPATAN** menyatakan langkah yang diambil oleh Kementerian untuk mengurangkan harga rumah baru.

JAWAPAN

Yang di-Pertua,

1. Untuk makluman Yang Berhormat, Kerajaan telah mengumumkan dalam ucapan Belanjawan 2019, beberapa langkah bagi membantu mengurangkan harga rumah baharu, antaranya:-
 - a) Pengecualian duti setem sehingga RM300,000.00 yang pertama ke atas surat cara pindah milik dan perjanjian pinjaman bagi tempoh 2 tahun sehingga Disember 2020 bagi pembeli rumah pertama bernilai sehingga RM500,000.00.
 - b) Pengecualian Cukai Jualan dan Perkhidmatan (SST) ke atas perkhidmatan pembinaan dan bahan binaan dan sebagai balasan, Persatuan Pemaju Hartanah dan Perumahan Malaysia (REHDA) telah bersetuju untuk mengurangkan sebanyak 10% harga rumah yang tidak tertakluk kepada kawalan harga untuk projek baharu.
 - c) Pengecualian duti setem ke atas surat cara pindah milik bagi pembelian rumah pertama, berharga antara RM300,001.00 hingga RM1 juta berkuatkuasa bagi tempoh 6 bulan mulai 1 Januari 2019 yang akan menjadi sebahagian daripada Kempen Pemilikan Rumah Kebangsaan, di mana pemaju akan menawarkan diskaun 10% ke atas harga hartanah kediaman projek sedia ada.
2. Untuk makluman Yang Berhormat jua, Kementerian Perumahan dan Kerajaan Tempatan (KPKT) telah mengambil langkah yang serius bagi mengurangkan harga rumah dalam pasaran, antaranya ialah:

- a) Penggunaan Sistem Bangunan Industri (IBS) yang ditambah baik melalui kerjasama dengan Kementerian Kerja Raya (KKR) agar kos pembinaan dapat dikurangkan tanpa menjejaskan standard kualiti perumahan;
 - b) Penetapan kategori harga rumah berdasarkan pendapatan mengikut kawasan iaitu bandar dan luar bandar serta jenis rumah; dan
 - c) Pelaksanaan penyediaan 1 juta Rumah Mampu Milik (RMM) dalam tempoh 10 tahun seperti dalam Manifesto Pakatan Harapan.
3. Manakala, langkah-langkah sedia ada bagi mengekang kenaikan harga rumah terus dilaksanakan antaranya:
- a) Memperkemas Cukai Keuntungan Harta Tanah (CKHT) ke atas keuntungan daripada pelupusan harta tanah dan saham dalam syarikat hartanah dalam tahun ke-6 dan tahun seterusnya, seperti berikut:
 - i) Menaikkan kadar CKHT dinaikkan daripada 5% kepada 10% bagi syarikat, individu bukan warganegara dan bukan pemastautin tetap.
 - ii) Menaikkan kadar CKHT daripada 0% kepada 5% bagi individu warganegara dan penduduk tetap. Walau bagaimanapun, CKHT dikecualikan atas harga hartanah, rumah kos rendah, rumah kos sederhana rendah dan rumah mampu milik di bawah RM200,000.00.

- b) Menaikkan harga jualan minimum rumah yang boleh dibeli oleh warga asing kepada RM 1 juta seunit;
- c) Mensyaratkan pemaju untuk mempamerkan ketelusan harga jualan hartanah secara terperinci termasuk semua manfaat / insentif yang bakal diberikan kepada pembeli;
- d) Melarang pemaju melaksanakan kaedah pemasaran berasaskan *Developer Interest Bearing Scheme* (DIBS) yang dikhuatiri boleh mengelirukan dan memanipulasi pembeli rumah;
- e) Mewajibkan semua pemaju untuk melaporkan pembelian pukal yang melebihi 4 unit hartanah dalam satu pemajuan oleh mana-mana individu mahupun syarikat; dan
- f) Mengeluarkan panduan mengenai *Loan to Value* (LTV) bagi pembelian rumah ketiga dan seterusnya, di mana pembeli hanya akan memperoleh pinjaman maksimum 70% sahaja. Baki selebihnya perlu ditanggung sendiri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : DATO' MASIR KUJAT [SRI AMAN]

TARIKH : 15 NOVEMBER 2018 (KHAMIS)

SOALAN NO.35

Dato' Masir Kujat [Sri Aman] minta **MENTERI PENDIDIKAN** menyatakan bilakah Kolej Komuniti akan dibina di Bandar Sri Aman.

JAWAPAN

Tuan Yang di-Pertua,

Untuk makluman Ahli Yang Berhormat, penubuhan sesebuah Institusi Pengajian Tinggi Awam (IPTA) mahupun cawangannya dibuat berdasarkan keperluan strategik negara. Ia dibuat dengan mengambil kira kemampuan pembiayaan Kerajaan, kepentingan bidang tujuan tertentu terhadap pembangunan sosio-ekonomi negara, sumber manusia yang mencukupi serta keperluan sumber tenaga yang diperlukan dalam pasaran kerja.

Sehingga kini, tiada perancangan untuk membina dan menubuhkan Kolej Komuniti di Bandar Sri Aman. Fokus Kementerian adalah untuk memperkasakan IPTA sedia ada. Terdapat 13 IPTA sedia ada bagi menampung keperluan pendidikan tinggi di Negeri Sarawak iaitu:

- 1) Universiti Teknologi MARA (UiTM) Kota Samarahan
- 2) Universiti Teknologi MARA (UiTM) Kota Samarahan 2
- 3) Universiti Teknologi MARA (UiTM) Mukah
- 4) Universiti Malaysia Sarawak (UNIMAS)
- 5) Politeknik Kuching
- 6) Politeknik Mukah
- 7) Politeknik Betong
- 8) Kolej Komuniti Kuching
- 9) Kolej Komuniti Mas Gading
- 10) Kolej Komuniti Miri
- 11) Kolej Komuniti Betong
- 12) Kolej Komuniti Santubong
- 13) Kolej Komuniti Sarikei

Pihak Kementerian Pendidikan Malaysia yakin pendidikan secara keseluruhan di Sarawak dapat dioptimumkan dengan adanya 13 buah IPTA ini.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATUK ZAHID BIN ZAINAL ABIDIN

TARIKH : 15 NOVEMBER 2018

SOALAN :

DATUK ZAHID BIN ZAINUL ABIDIN [PADANG BESAR] minta **Menteri Tenaga Manusia** menyatakan apakah perancangan garis masa kenaikan gaji minimum yang akan dilaksanakan Kerajaan bagi mencapai gaji minimum RM1,500 dalam masa 5 tahun.

PR-1412-L02735

JAWAPAN

Tuan Yang Di Pertua,

1. Majlis Perundingan Gaji Negara (MPGN) melalui Akta MPGN 2011 (Akta 732) akan menjalankan sekurang-kurangnya dua lagi Kajian Semula Perintah Gaji Minimum dalam tempoh lima tahun pemerintahan Kerajaan Pakatan Harapan. Diharap melalui 2 kajian tersebut kadar gaji minimum dapat mencapai RM1,500 sebulan dalam tempoh 5 tahun (1 penggal pemerintahan Kerajaan).
2. Namun begitu, sebarang peningkatan kepada kadar gaji minimum adalah bergantung kepada berbagai faktor termasuk kedudukan ekonomi negara. Di samping itu, daya saing negara juga perlu diambil kira kerana kadar gaji minimum yang terlalu tinggi boleh menjejaskan usaha Kerajaan untuk menarik masuk pelabur asing ke negara ini.
3. Kesimpulannya, Kerajaan sedar peri pentingnya dasar gaji minimum kepada warga pekerja, khususnya pekerja dalam golongan B40. Namun, sebarang peningkatan kadar gaji minimum yang mendadak sudah pasti akan menyebabkan kesukaran kepada majikan, terutama majikan Industri Kecil dan Sederhana (IKS) untuk membayar gaji minimum. Oleh itu, kebolehpekerjaan (*employability*) pekerja-pekerja juga perlu diberi pertimbangan teliti agar gaji minimum yang terlalu tinggi tidak akan membuatkan majikan

membuang pekerja kerana ketidakmampuan untuk membayar gaji minimum.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 15 NOVEMBER 2018 (KHAMIS)

SOALAN NO.37

Minta **MENTERI PENDIDIKAN** menyatakan berapa bilangan pelajar pelbagai kaum dari Sarawak seperti kaum Iban, Bidayuh, Orang Ulu (Kayan, Kenyah, Punan, Sakapan, Penan, Sihan, Seping, Beketan, Ukit, Tanjong dan Kejaman) telah diambil masuk ke UiTM pada tahun 2018.

JAWAPAN

Tuan Yang di-Pertua,

Untuk makluman Ahli Yang Berhormat, sehingga 4 Oktober 2018, bilangan pelajar kelahiran Sarawak di UiTM adalah seramai 9,518 orang. Daripada jumlah tersebut, 1,452 orang adalah kaum Iban, 659 orang kaum Bidayuh dan 226 orang dari kaum Orang Ulu.

Sekian, terima kasih.

RJM102

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJAH AZIZAH BINTI
DATUK SERI PANGLIMA HAJI MOHD
DUN
[BEAUFORT]**

TARIKH SOALAN : 15 NOVEMBER 2018 (KHAMIS)

SOALAN NO.38

Minta **MENTERI PEMBANGUNAN USAHAWAN** menyatakan jenis-jenis bantuan/sokongan yang dirancang akan diberikan kepada bakal usahawan/usahawan Bumiputera dan bukan bumiputera dalam tempoh lima tahun bermula sekarang.

JAWAPAN

Tuan Yang di-Pertua,

Kementerian Pembangunan Usahawan sedang merancang pelbagai jenis bantuan dan sokongan kepada usahawan dan bakal usahawan tanpa mengira status Bumiputera atau bukan Bumiputera. Bantuan dan sokongan yang disediakan adalah dalam aspek seperti berikut:

- (i) pembiayaan perniagaan sama ada dalam bentuk pinjaman atau geran. Ini meliputi pembiayaan bagi tujuan memulakan perniagaan, memperbesarkan perniagaan, pembiayaan premis perniagaan, pembiayaan kenderaan komersial/jentera berat dan sebagainya;
- (ii) pembangunan modal insan keusahawanan melalui bimbingan, latihan dan khidmat nasihat serta *mentoring programme*. Ini bertujuan untuk meningkatkan pengetahuan dan kemahiran keusahawanan serta membina pemikiran atau minda keusahawanan (*entrepreneurial mindset*) bagi melahirkan usahawan yang berdaya maju, berdaya saing dan berdaya tahan; dan
- (iii) penerokaan serta pewujudan peluang-peluang dalam bidang perniagaan baharu di samping menggalakkan penglibatan usahawan dalam industri-industri strategik seperti automotif, aeroangkasa, *renewable energy*, ekonomi digital dan industri halal.

Walau bagaimanapun, bantuan pembiayaan di masa akan datang akan dilaksanakan dengan lebih bersasar bagi memastikan bantuan hanya akan disalurkan kepada usahawan dan PKS yang berkeelayakan dan di dalam bidang-bidang keutamaan.

Di samping itu, Kementerian juga memberi sokongan kepada usahawan melalui platform-platform seperti berikut:

- (i) penubuhan Pusat Sehenti Keusahawanan (PSK) yang telah dilancarkan oleh Kementerian pada 2 Oktober 2018 dan kini telah diwujudkan antaranya di Kuala Lumpur, Kelantan, Melaka, Selangor, Johor dan Kedah. PSK ini berperanan mengendalikan fasilitasi dan khidmat nasihat berkaitan keusahawanan;

- (ii) penubuhan *Entrepreneur Development Advisory Council* (EDAC) yang dianggotai oleh pakar-pakar industri dan cendekiawan tempatan dan antarabangsa. EDAC berperanan membantu menggubal dasar dan strategi keusahawanan yang relevan dan efektif berdasarkan fungsi-fungsi yang telah diperuntukkan kepada Kementerian Pembangunan Usahawan; dan
- (iii) penganjuran Konvensyen Memperkasakan Usahawan Bumiputera di seluruh Negara bagi membolehkan interaksi libat urus secara langsung antara Kerajaan dan usahawan di peringkat akar umbi. Sehingga kini, Konvensyen Memperkasakan Usahawan Bumiputera telah diadakan di Sarawak pada 6 September 2018, Kelantan pada 13 September 2018, Sabah pada 17 September 2018, Melaka pada 21 Oktober 2018, Kedah pada 25 Oktober 2018 dan Johor pada 13 November 2018. Melalui Konvensyen ini, Kementerian mendapat maklum balas terus daripada para usahawan di peringkat akar umbi berhubung isu dan cabaran keusahawanan di samping pandangan dan cadangan bagi memperkasakan ekosistem keusahawanan Negara.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN
RAZALI
[KUALA NERUS]**

TARIKH : 15 NOVEMBER 2018 (KHAMIS)

SOALAN NO. 39

Minta **MENTERI HAL EHWAL EKONOMI** menyatakan implikasi kewangan yang dihadapi oleh PETRONAS dan Kerajaan daripada pemberian royalti kepada negeri-negeri pengeluar minyak.

JAWAPAN

Yang di-Pertua,

Dalam sebarang usaha eksplorasi dan pengeluaran yang telah dimeterai melalui Kontrak Perkongsian Pengeluaran (*PSC – Production Sharing Contract*), 10% daripada hasil pengeluaran petroleum dari kawasan kontrak diperuntukkan untuk pembayaran tunai yang biasanya dikenali sebagai royalti minyak. Jumlah 10% tersebut, kemudiannya akan dibahagikan sama rata antara kerajaan persekutuan dan negeri pengeluar, di mana masing-masing akan mendapat 5% dari hasil pengeluaran kasar. Pembayaran tunai ini dijelaskan tanpa mengira sama ada pengeluaran dari setiap lapangan di dalam kawasan kontrak menguntungkan ataupun tidak.

Di antara implikasi yang akan dihadapi oleh PETRONAS dan Kerajaan dalam pertimbangan pemberian royalti kepada negeri-negeri pengeluar minyak adalah seperti berikut:

- (i) mengecilkan anggaran keuntungan minyak (*profit oil*) yang dikongsi oleh PETRONAS dan pengusaha PSC dari paras semasa iaitu dari 20% kepada 5% sebelum cukai. Memandangkan pelaburan dalam sektor hulu melibatkan risiko yang tinggi dan memerlukan modal pendahuluan yang amat besar, penurunan *profit oil* ini sudah tentu akan memberi impak yang negatif kepada pulangan pelaburan PETRONAS dan pengusaha PSC.
- (ii) Pengurangan *profit oil* yang drastik akan mempercepatkan penghujung hayat ekonomi lapangan-lapangan minyak yang sedang beroperasi. Selain daripada itu, lapangan-lapangan yang baru ditemui pula akan menjadi lebih mencabar untuk dibangunkan disebabkan oleh pulangan ekonomi yang marginal.

- (iii) Pembekalan gas dari Sabah dan Sarawak ke loji gas asli cecair atau *Liquefied Natural Gas* (LNG) di Bintulu juga akan tergugat yang seterusnya akan menjejaskan kontrak LNG jangka panjang antara PETRONAS dengan pelanggan antarabangsanya. Ini sekaligus akan memberikan impak yang tidak sihat terhadap reputasi PETRONAS dan Malaysia sebagai salah satu pengeluar LNG terbesar dunia.
- (iv) Peningkatan royalti ke 20% juga akan menjejaskan daya tarikan Malaysia sebagai destinasi pelaburan bagi banyak syarikat-syarikat minyak luar negara. Ini kerana pembangunan lapangan minyak dan gas di Malaysia dijangkakan akan menjadi semakin mencabar disebabkan geologi yang semakin kompleks dan kedudukannya di laut dalam yang memerlukan modal yang besar dengan kepakaran tertentu. Untuk makluman, kini terdapat lebih daripada 40 pelabur PSC di Malaysia, yang mana 80% adalah pelabur asing.
- (v) Kekangan kewangan yang bakal dihadapi PETRONAS turut akan menjejaskan keupayaan PETRONAS untuk melabur di luar negara. Oleh kerana pembangunan minyak dan gas di Malaysia menjadi semakin rumit, pelaburan di luar negara adalah penting daripada sudut strategik bagi membolehkan PETRONAS mengimbangi portfolio perniagaannya dan memastikan kelestarian sumber petroleum yang boleh digunapakai di Malaysia.
- (vi) Pendapatan Kerajaan Persekutuan akan terjejas disebabkan kurangnya pendapatan daripada *Petroleum Income Tax (PITA)* dan keupayaan syarikat untuk memberikan pulangan dividen yang tinggi kepada Kerajaan. Kesannya, penarafan kredit untuk Kerajaan Persekutuan mahupun PETRONAS akan dinilai semula.

- (vii) Selain daripada impak ekonomi, terdapat juga kerumitan daripada segi undang-undang kerana perjanjian PSC sedia ada dengan jelas menyatakan pembayaran tunai maksimum adalah sebanyak 10%. Sebarang cubaan untuk meningkatkan pembayaran tunai berkemungkinan besar akan mendapat tentangan pengusaha PSC dan boleh menjurus kepada tindakan undang-undang.

Sekian, terima kasih.

15 November 2018

Kementerian Hal Ehwal Ekonomi

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : DATUK AARON AGO DAGANG
[KANOWIT]**

TARIKH : 15 NOVEMBER 2018 (KHAMIS)

SOALAN : 40

PR-1412-L01699

Datuk Aaron Ago Dagang [Kanowit] minta **MENTERI KOMUNIKASI DAN MULTIMEDIA** menyatakan status liputan selular dan “internet connectivity” di Sarawak. Bilakah semua sekolah di pedalaman Sarawak akan dapat liputan tersebut.

JAWAPAN:

Tuan Yang di-Pertua,

1. Untuk makluman Ahli Yang Berhormat, berhubung penyediaan perkhidmatan internet ke sekolah-sekolah, ianya adalah di bawah seliaan Kementerian Pendidikan Malaysia melalui projek 1Bestarinet.
2. Namun begitu, pihak Kerajaan secara berterusan menyediakan perkhidmatan komunikasi di seluruh negara termasuklah di kawasan luar bandar melalui pelbagai inisiatif yang berasaskan pembangunan infrastruktur komunikasi.
3. Di antaranya, inisiatif Peluasan Liputan Selular dan Jalur Lebar Mudah Alih yang melibatkan pembinaan menara komunikasi baharu dan penaiktarafan menara komunikasi sedia ada, sebanyak 412 menara komunikasi baharu telah siap dibina dan beroperasi dengan perkhidmatan jalur lebar mudah alih 3G manakala 57 menara sedang dalam peringkat pelaksanaan di Sarawak terutamanya di kawasan di luar bandar.
4. Selain itu, sebanyak 1,080 menara sedia ada telah dinaiktaraf kepada perkhidmatan jalur lebar mudah alih 3G/4G manakala 107 menara sedia ada masih dalam peringkat penaiktarafan di Sarawak.

SOALAN NO: 40

5. Di bawah projek Jalur Lebar Pinggir Bandar (SUBB) dan Jalur Lebar Luar Bandar (RBB) pula yang menyediakan kemudahan jalur lebar dengan kelajuan sehingga 20Mbps di kawasan pinggir dan luar bandar, sebanyak 65 ibusawat sedang dinaiktaraf di Sarawak yang dijangka akan siap secara berperingkat pada tahun 2019.
6. Projek Jalur Lebar Berkelajuan Tinggi (HSBB) yang melibatkan 13 ibusawat di Sarawak telah siap sepenuhnya pada tahun 2017 dengan menyediakan kemudahan jalur lebar dengan kelajuan sehingga 100Mbps di bandar-bandar utama, ibu-ibu negeri dan kawasan-kawasan ekonomi yang berimpak tinggi dengan jumlah keseluruhan 153 ribu sambungan tersedia.
7. Melalui inisiatif berterusan seperti ini, negara telah berjaya mencapai tahap peratusan liputan jalur lebar berpenduduk di seluruh negara sehingga 93.5%. Kerajaan dengan kerjasama pemain industri sedang giat melaksanakan pelbagai inisiatif yang berasaskan pembangunan infrastruktur komunikasi bagi memastikan 95% peluasan kawasan liputan jalur lebar berpenduduk dapat dicapai pada tahun 2020.
8. Sehingga kini, liputan selular dan rangkaian internet di Sarawak telah mencapai 78.0% (3G) dan 49.3% (LTE).

NO. SOALAN: 41

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB DATO' SERI DR. AHMAD ZAHID BIN
HAMIDI [BAGAN DATUK]**

TARIKH : 15 NOVEMBER 2018
MENJAWAB

SOALAN : 41

YB DATO' SERI DR. AHMAD ZAHID BIN HAMIDI [BAGAN DATUK]
minta **PERDANA MENTERI** menyatakan apakah rasionalnya pihak
pendakwaan meminda pertuduhan yang dikenakan ke atas 57 individu
yang terlibat dengan kumpulan jenayah terancang Geng 360 Devan
daripada Akta Kesalahan Keselamatan (Langkah-Langkah Khas) 2012
(SOSMA) kepada Akta Pertubuhan 1966.

JAWAPAN: YB TUAN MOHAMED HANIPA MAIDIN
Timbalan Menteri Di Jabatan Perdana Menteri

Tuan Yang di-Pertua,

1. Perkara 145 Perlembagaan Persekutuan memperuntukkan kuasa kepada Peguam Negara untuk memulakan, menjalankan atau memberhentikan apa-apa pendakwaan jenayah dan prosiding di bawah Kanun Tatacara Jenayah [*Akta 593*].
2. Subseksyen 376(1) Kanun Tatacara Jenayah pula memperuntukkan kuasa kepada Peguam Negara selaku Pendakwa Raya untuk mengawal dan memberikan arahan dalam apa-apa pendakwaan jenayah dan prosiding di bawah Kanun Tatacara Jenayah.

3. Berhubung dengan kes lima puluh tujuh individu yang terlibat dengan kumpulan jenayah terancang Geng 360 Devan yang dipertuduh di bawah Akta Kesalahan Keselamatan (Langkah-Langkah Khas) 2012 [*Akta 747*] dan kemudian dipinda kepada pertuduhan di bawah Akta Pertubuhan 1966 [*Akta 335*], pertuduhan ke atas mereka dipinda setelah semua aspek keterangan dinilai semula. Penilaian semula tersebut mendapati keterangan yang sedia ada lebih menjurus kepada pelaksanaan kesalahan di bawah Akta Pertubuhan 1966.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 15 NOVEMBER 2018

SOALAN : 42

Tuan Nik Mohamad Abduh bin Nik Abdul Aziz [Bachok] minta **PERDANA MENTERI** menyatakan langkah penambahbaikan sistem daftar pemilih dan jaminan pilihan raya yang lebih adil.

JAWAPAN: YB TUAN MOHAMED HANIPA MAIDIN
Timbalan Menteri Di Jabatan Perdana Menteri

Tuan Yang Dipertua,

Untuk makluman Ahli Yang Berhormat, Suruhanjaya Pilihan Raya (SPR) dalam menjalankan fungsi pendaftaran pemilih sentiasa mensasarkan matlamat menghasilkan daftar pemilih yang diyakini oleh semua pihak untuk diguna pakai dalam suatu pilihan raya umum atau pilihan raya kecil. Selain itu, SPR juga **sentiasa terbuka untuk menerima cadangan-cadangan penambahbaikan daripada pelbagai pihak** terhadap sistem pendaftaran pemilih sedia ada.

Berhubung dengan cadangan pelaksanaan urusan pendaftaran pemilih secara automatik, SPR **sedang meneliti berkaitan perkara tersebut** di mana ia akan melibatkan cadangan pindaan kepada undang-undang sedia ada, perubahan proses dan prosedur kerja urusan pendaftaran pemilih, keperluan sistem dan peralatan serta implikasi kewangan.

Di samping itu, SPR juga telah mewujudkan **Jawatankuasa Dasar Penambahbaikan Daftar Pemilih** di mana jawatankuasa tersebut akan membuat penelitian yang menyeluruh terhadap isu-isu yang berkaitan dengan urusan pendaftaran pemilih dan seterusnya mengenal pasti mekanisme yang sesuai dan terbaik untuk dilaksanakan oleh SPR kelak.

Selain itu, SPR juga mengadakan kerjasama **dengan Jawatankuasa Pembaikan Sistem dan Undang-Undang Pilihan Raya Malaysia (Electoral Reform Committee - ERC)** bagi meneliti dan mengkaji

cadangan-cadangan penambahbaikan berkaitan urusan pendaftaran pemilih. Justeru, SPR sentiasa berusaha untuk **memastikan setiap cadangan penambahbaikan sekiranya bersesuaian dapat dilaksanakan dengan jayanya** serta menepati kehendak undang-undang yang sedang berkuat kuasa.

Bagi memastikan sistem dan proses pilihan raya dilaksanakan secara berintegriti, semua langkah yang telah diambil oleh SPR adalah mematuhi undang-undang dan peraturan yang sedang berkuat kuasa. Selain itu, SPR juga sedang meneliti dan mendapatkan pandangan daripada pelbagai pihak seperti Jawatankuasa Pilihan Khas di bawah Parlimen berhubung Penambahbaikan Proses Pilihan Raya (2012), masyarakat sivil, badan bukan Kerajaan, parti-parti politik dan ahli-ahli akademik berkaitan cadangan penambahbaikan sistem pilihan raya.

Sekian, terima kasih.

PEMBERITAHUAN PERTANYAAN BAGI JAWAPAN LISAN

MESYUARAT KEDUA, DEWAN RAKYAT

PENGGAL PERTAMA, PARLIMEN KEEMPAT BELAS

MAJLIS MESYUARAT DEWAN RAKYAT

PERTANYAAN : JAWAB LISAN

DARIPADA : DATO' HASBULLAH BIN OSMAN [GERIK]

TARIKH : 15 NOVEMBER 2018 (KHAMIS)

SOALAN :

Dato' Hasbullah Bin Osman [Gerik] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah pihak Kementerian bercadang untuk menghentikan atau mengkaji semula skim bantuan di bawah Kementerian memandangkan Kerajaan telah menyatakan bahawa kewangan Negara tidak stabil serta rakyat tidak mahu menjadi malas kerana mengharapkan bantuan kerajaan.

JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA DAN
MASYARAKAT

Tuan Yang di-Pertua,

Kementerian melalui Jabatan Kebajikan Masyarakat (JKM) telah menyediakan bantuan kewangan kebajikan untuk meringankan beban kumpulan sasar buat sementara waktu sehingga kumpulan sasar ini mampu untuk keluar daripada kepompong kemiskinan dan mampu ke arah hidup berdikari. Ini adalah kerana, bantuan kebajikan yang diberikan adalah bukan untuk menampung kos sara hidup sepenuhnya sebaliknya ia adalah untuk membantu meringankan beban kewangan yang dialami oleh kumpulan sasar untuk hidup yang lebih selesa dan sempurna.

Oleh yang demikian bagi memastikan kebajikan dan kesejahteraan kumpulan sasar, Kerajaan akan meneruskan pemberian bantuan kewangan kebajikan mengikut skim bantuan kewangan persekutuan yang sedia sama ada secara bulanan atau sekali gus kepada kumpulan sasar yang memerlukan. Sehingga September 2018 JK M telah

memperuntukkan sebanyak RM1,412,558,915.00 untuk disalurkan kepada 426,185 penerima bantuan.

Skim-skim bantuan kewangan kebajikan secara bulanan adalah dikekalkan dengan kadar seperti berikut:

1. **Bantuan Kanak-kanak**, dengan kadar RM100 hingga maksimum RM450 sebulan dipertimbangkan kepada keluarga miskin atau ibu / bapa tunggal yang menjaga anak-anak mereka.
2. **Bantuan Orang Kurang Upaya Tidak Berupaya Bekerja**, dengan kadar RM250 sebulan dipertimbangkan kepada Orang Kurang Upaya yang tidak berupaya bekerja kerana keadaan kecacatan mereka yang teruk dan tidak berupaya bekerja.
3. **Elaun Pekerja Cacat**, dengan kadar RM400 sebulan dipertimbangkan kepada Orang Kurang Upaya yang sedang bekerja yang pendapatannya kurang daripada RM1,200 sebulan, sebagai insentif supaya mereka terus bekerja.
4. **Bantuan Penjagaan Orang Kurang Upaya Terlantar dan Pesakit Kronik Terlantar**, dengan kadar RM350 seorang sebulan dipertimbangkan kepada penjaga Orang Kurang Upaya Terlantar atau Pesakit Kronik Terlantar bagi mengurangkan bebanan

perbelanjaan keluarga penjaga serta memastikan penjagaan yang berkualiti.

5. **Bantuan Orang Tua**, dengan kadar RM350 sebulan dipertimbangkan kepada warga emas yang tidak mempunyai pendapatan untuk meneruskan kehidupan harian.
6. **Bantuan Am Persekutuan**, dengan kadar RM100 hingga RM350 sebulan dipertimbangkan kepada keluarga miskin dan kumpulan sasar lain yang memerlukan,
7. **Bantuan Latihan Perantis**, dengan kadar RM200 sebulan dipertimbangkan kepada semua kumpulan sasar JKM yang bersedia untuk mengikuti latihan kemahiran atau penempatan kerja bagi menambahkan kemahiran dalam sesuatu bidang.
8. **Bantuan Anak Pelihara**, dengan kadar RM250 sebulan hingga maksimum RM500 sebulan sekeluarga bagi meringankan tanggungan keluarga pelihara yang sanggup menjaga anak-anak pelihara seperti anak sendiri.

Selain itu, bantuan kewangan sekali gus turut dikekalkan untuk manfaat kumpulan sasar dengan kadar seperti berikut:

1. **Bantuan Geran Pelancaran**, dengan kadar RM2,700 sekaligus dipertimbangkan kumpulan sasar JKM bagi memulakan projek atau

pekerjaan yang boleh mendatangkan pendapatan ke arah berdikari dan tidak bergantung kepada bantuan bulanan selama-lamanya.

2. **Bantuan Alat Tiruan / Sokongan**, dengan kadar sebenar alat tiruan / sokongan tersebut bagi membantu kumpulan sasar JKM yang tidak berkemampuan untuk membeli alat tiruan atau alat sokongan seperti kaki palsu, kerusi roda, alat pendengaran, dan lain-lain peralatan yang bersesuaian dan diperlukan.

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

DARIPADA : YB DATO' SRI DR. HAJI ISMAIL BIN HAJI ABD. MUTALLIB [MARAN]

TARIKH : 15 NOVEMBER 2018 (KHAMIS)

SOALAN:

Dato' Sri Dr. Haji Ismail bin Haji Abd. Muttalib [Maran] minta **PERDANA MENTERI** menyatakan adakah Kementerian mempunyai perancangan untuk membantu mendaftarkan pusat tahfiz yang berkelayakan dan memenuhi syarat, namun pada masa ini tidak berdaftar dengan pihak berkuasa.

JAWAPAN : **(YB DATUK SERI DR MUJAHID YUSOF, MENTERI DI JABATAN PERDANA MENTERI)**

Tuan Yang di-Pertua,

Sebagaimana Ahli Yang Berhormat sedia maklum, semua institusi pendidikan agama termasuk sekolah tahfiz yang ditubuhkan oleh pelbagai pihak adalah perlu berdaftar dan tertakluk kepada Enakmen Kawalan Sekolah-Sekolah Agama atau undang-undang dan peraturan yang sedang berkuatkuasa di negeri berkenaan. Oleh itu, usaha untuk mendaftar perlu

digerakkan oleh pihak berkuasa agama negeri serta kesedaran pihak pengurusan sekolah untuk mendaftar.

Walau bagaimanapun, pada tahun 2017, Kerajaan telah memperkenalkan insentif Pendaftaran Institusi Tahfiz Swasta yang mana sebanyak 33 buah institusi tahfiz telah menerima insentif sebanyak RM10,000.00 setiap satu seluruh negara melalui peruntukan penyelarasan Dasar Pendidikan tahfiz Negara (DPTN).

Selain itu, Kerajaan Persekutuan melalui Jabatan Kemajuan Islam Malaysia (JAKIM) telah menggubal Dasar Pendidikan tahfiz Negara (DPTN) yang mana salah satu terasnya berkaitan dengan penambahbaikan aspek pendaftaran iaitu memantapkan undang-undang dan penguatkuasaan.

Selain itu, Kerajaan juga telah mencadangkan pindaan kepada Akta Pentadbiran Undang-Undang Islam (Wilayah-Wilayah Persekutuan) 1993 ["Akta 505"] dalam peruntukan berkaitan dengan sekolah agama Islam bagi melancarkan lagi urusan pendaftaran, pentadbiran dan pengawalseliaan sekolah-sekolah agama Islam yang termasuk sekolah tahfiz.

Dalam cadangan pindaan Akta 505 tersebut juga, Kerajaan akan mengkaji dan meneliti peruntukan-peruntukan yang boleh memberi kuasa kepada Majlis untuk menggubal kaedah-kaedah yang berkaitan dengan sekolah-sekolah agama Islam termasuk peruntukan-peruntukan yang berkaitan dengan kesalahan dan penalti terhadap mana-mana pelanggaran kepada kaedah-kaedah tersebut dan undang-undang sedia ada

Sekian, terima kasih.